

# KOHIMA AO BAPTIST AROGO 2017 MISSION OSANG



**MISSION MAPA NUNG ASENTENSHI**



Mission Board 2017



KABA 2017 Mission Week O jembirtem aser Deacon & Mission Board members



ABAM ajanga David Walling & Lanuyanger Ozukum Oct 22, 2017  
Christian Ministry License agutsu

2017  
MISSION OSANG  
Volume 3

Copyright: Kohima Ao Baptist Arogo

**Editorial Committee:**

Dr. Bendangyapangla  
Mr. C. Temjen Jamir  
Mr. Lanu Jamir  
Mr. Moanochet Amer  
Rev. Arenla Longchar

Cover Design: Bendangtuba Longkumer & Moanochet Amer

Layout design: Mr. Moanochet Amer

Printed at : N. V. Press, Kohima

KOHIMA AO BAPTIST AROGO  
P.O. Kohima 797 001  
Nagaland, India

Contact No. – 09436603190 / 09856258382

Email: [kabamission@gmail.com](mailto:kabamission@gmail.com)  
[kabamissionmag@gmail.com](mailto:kabamissionmag@gmail.com)

# Keta Alibatem

Tenyaba mapa nung asentenshi	1
2017 Mission Report	3
KABA General Mission ministry 2017	8
KABA Evangelistic Committee 2017	11
2017 Sarasadem Committee Osang	14
Women Ministry - I	17
Christian Education Ministry	19
2017 KABA Youth Ministry	21
Mishmi Agape Mission	23
Missional Kibong	27
Missionary nungi Osang	29
David walling aser par kibong nungi	30
STM Dehradun Report	31
Ministry closure at Naga Christian Fellowship, Mumbai	32
Naga Christian Fellowship Mysore	33
Khandbari, Nepal nung Tsüngtong	34
Tamang Nokinketertem	36
Don's home nungi Missionary Osang	38
HITI Memorial School Silonijan	39
Mission angatetba nung	40
Naga Christian Fellowship Dehradun	42
Short term Missionary	43
Naga Christian Fellowship Aizawl	44
Himachal Pradesh nung Tsüngtong Tenyaba	46
Maela Regugee Camp	47
Bhengi nung short term Missionary	48
Uttarkashi nung short term Missionary inyakba	49
Tsüngremer Mission Tasen ka Merangdangba	50
Kü Taküm Khuli	51
Missionary Tesayur Osang	52
Project Ergon Osang	53
Sawang Wittaya School nungi	54
Multi Community Church	57
2017 KABA Missionary Retreats- Thailand & India	58
Missionary David aser Svea Flood otsü	60
SBBM nung short term Missionary	63
Free Health Clinic	64
KABA Tajung Samaria 2017	66
2017 Father School	67
MAM field nung short term Missionary	68

# TENYABA MAPA NUNG ASENTENSHI



*Rev.M.Asangba Longkümer  
Senior Pastor*

**A**sentensi tetezü zübazülema mamshi-i yua aliba oset yanglushia tasen kümshia amshiba. Mivila ka teremseper lia süng tajung bener arua atsükba ajanga mi tulu küm jangrudaktsüba ta angatetdi. Tajungba aser tulubaji ajaki aginer, Kidang Television screen tila ka ali nung joko iba melena tuluba ka bushia alia ayuba ama, ki tejen tasen küm yanglushiba ama, mission mapaji tuluba tajungba küm yanglushitsü nüngdaker.

Tang inyakya aliba dang nungi tenyaba mapa tuluba aser tajungba küm inyaktsü kanga nüngdaker, koba dang asentensi ta ajar. Tenyaba mapa nung asentenshitsübaji kanga tongtipang aser iba ya Tsüngrem sentong angateta, Tsüngrem Tanelai anidaktsüba ajanga takokbaji angur. Mapa ka melenshia tajungba inyaktsübaji temela masü, kechiaser timtem, tetsükdaktsü aser tenokdangtsü aika ajurur, saka itemji ajanga otetra asentenshiji ibajı asütsü. Aiben aseni mission mapa inyakbaji item nungi rangloker takok ngua inyaker amai bilemer : arogo nung nütsüng aika aliba ajanga, ki o jen aika süa aliba ajanga, sentep sentong balala jangratema inyaka aoba ajanga, ken jangratema atenba ajanga , Tsüngrem O kanga junga jembiba ajanga, rongsen aika aliba ajanga, bendanglen mission mapa tulu aika inyakba ajanga ta bilemer. Item ajakji kanga dang tongtipang, saka Tsüngrem O nung reprangdangra tenyaba mapa nung asentenshiji Tamang, Teimla aser Temeim nung ajemdaker asadanger. Arogoji taküm aliba lokti ka (a living organism) asünung, osang tajung sangdongba maneni tuluba küm aintsü nüngdaker. Arogo tashi ita ainba ajanga mission tuluba kümtsür. Arogo nung toklang tenzükertem aser züngsem ajak kesasa mission asoshi khuret aliba ajanga, Tanela Temeshi-i nüpu aser lushi tejangja sayuba metettsüsa Tsüngremer mangdang metetba aser angatetba ajanga ( Acts 13,14). Isaia ainkar kaket nung yamai ashir, “Nü süki ulushiang na talitak teindangba sü atsülangang. Anunga teyu, nü lisü talang kümdakjang, aser nü süng tasongba tashi itdakjang” Isa 54:2. Tenyaba mapa nung asentensi atoktsü asoshi arogo pur ajaki yamai angatetdi. Mission tetezü, kümzükba pur shiaji Mission. Aser mekümzükba pur shiaji mission fieldji lir.

William Carey-i yamai ashir, “Attempt great things for God, expect great things from God” - Tsüngrem asoshi tulu ka inyakang aser Tsüngrem nungi tuluka yimla-ang. Tang asen arogoi tenyaba mapa nung kanga meranga aser junga inyakdaki . Saka ano tajungba aser tangatetba nung inyaktsü asoshi asentensi nüngdaker. Sürapangla kechi nungsa asentenshitsüla.

- Agütsüba nung: Honibar aonung mission tenla ₹10 mesüra ₹20 agütsüba yimya ya melenshitsüla. Na dokani ao nung sen metsü agi nai kechi alitettsü. Yamaji mission mapa inyaktsü nai sen metsü hopta ka nung agütsüba nungji temulung süa alir asü? Yisuibo pa taküm ajunga tenla agütsü.
- Sarasadem nung: Asen arogo ya missionary arogo ta jembir, sürabangla naia anogo shia sarasadem nung mapang kwika indoker. Sarasadem nung shilem magi-i aruya lira, asentenshidi

arung. Sarasadem nung missionarytem atema, sama-a alirtem atema asen nüksü agütsüdi.

- Khuli süba nung: Missionary ka ama na aotsü Tsüngremi jara arendaka meli-i aotsü apusodi. Na missionary tenüng jar arogoi commission sur meyokaka, nür kiyonger den, nü office nung, Hindu nunger, Muslim nunger, Buddhist nunger Yihova Tsüngrem memetetba nübor aika lir. Item rongnung mission mapa inyaktsü wadang tulu lir. Kibuba Yisui ashiba ama “Alu jenti mena lir saka nübo ishika dang”. Anungji nü taküm liba liro ajanga, nai inyaksangshiba ajanga, nai jembiba ajanga limapurtemi Yisu meteta akümtsü. Iba nung na aser ni shilem tulu lir ta angatetdi. Ibají inyaktetra tenyaba mapa nung asentenshiji aji asütsü.

Kaleb-i ashir “Anungji Kibubai iba anogo nung ashiba ama, iba tenem linük ya kü nem agüjang kechiaser idakji Anakim nunger aser yimti tulutem jara agi atsupanger koda liasü aji nai iba anogo nungto angashiogo. Kibubai jembiba ama kü den atentsü aser ni parnok aridoktsü akok” Yihusua 14:12. Mission mapa nung asentenshiji Yisu alimai missionary ka ama aruba nükjidong nung amendaker, pai inyaka sayuba tsüngsü nung anidaktsü merangbaji lir. Isa 61:1-2; Luk 4:16-21. Yisui inyakba ama, sensakertem dang osang tajung sangdongba nung shilem agitsü kanga tongtipang. Kodang sensaker ta jembir anasü nung aseni yamai angatetdi.

Mezüngbuba nung Tanelä nung sensaker, tanabuba nung shi taküm nung sensaker. Item telok anaprongla dang osang tajung sangdongba nung shilem agitsübaji kanga nüngdaker. Yisu alima nung alidang pai aria bilema item telok anaprongla den osang tajung sangdongba nung shilem kesasa agia liasü. Tanü asen arogoia item ana dak ya rangloker mapa inyaker.

Mezüngbuba nung osang tajung sangdongba mapa ya, Home Mission nung rangloker inyakba tongmelang agi kar shisemer. Free Health Clinic ita shia anaben Fellowship balala nung melentepa agir, aser idakji timtemer hospital-i moteter Ao-er dang masü, saka Naga nunger, aser hindu aser muslim tema arua iba nungji tena temoatsü agir.

Iba den ano Kohima nung aliba Bengali nunger asoshi Evangelist ka yua osangtajung sangdongba nung shilem agia arudaki. Parnok rongnung Yisu ajuruba temaitsü tzü nung baptia Khristan küma arudaki. Kasaji Dimapur town nunga Dudu Colony nung Muslim nunger rongnung Evangelist ka yur kanga junga mapa inyaka odaki. Yamaji mapang shia Khrista ajurua baptia Khristan akümba khuli lir.

Tanabuba nung osang tajung sangdongba mapa ya Outreach Mission, Arunachal nung Mishmi Agape Mission lushi mesema Tsüngrem dang mangdang meshia idakji Mission Co-Ordinatori anir takok ngua inyaka odaki. Mapang shia arogo purtem, tongtipangsa Sayutsüngi Committee aser Sarasadem Committee, nungi lua revival aser healing, aser prayer walk senzüa osang tajung sangdongba nung shilem agidaki. Iba den lanur temi short term missionary ka ama mapa tem inyaka aoer.

Iba den ano India lima tesem balala nung aser India atena oer alima balala nung osang tajung sangdongba nung shilem agidaki. Yamaji lanur tajung aika asen arogo nungi adoka missionary mapa temulung agüja inyakba angudang Tsüngrem tenüng asanger. Ano missionary aotsü asoshi tejangrartem aika lir. Asen arogoi nangzükba ama missionary aika adokdakjang ta maneni sarasademdi. Aser ibají tenyaba mapa nung asentenshibaji asütsü. Temalen shisemba ama tenyaba mapa ya missionary tem atema dang masü, saka arogo pur ajak iba nungi tena lir ta angateta tang koma inyakdaki iba dak tali awa-a oa inyaka aotsü asentenshidi ta ayongzüker.

Tsüngremi amangbapurtem moajang.

# 2017 KABA MISSION WEEK OSANG

Contributors – T. Yanger Imchen, Jemenremla Longchar, Abenla  
Compiled by - Lanu Jamir

**2**017 küm Mission Week omen “Mission Mapa nung Asentenshi” nung amentaker mission week sentong February 6–12, 2017 tashi liasü. KABA pastortem alaka arogoi sarasadema Mission field balala nungi item missionarytem aser tenzükertem KABA nung aliba fellowship balala nung o jembitsü jaok.

1. Mrs. Onenlemla, Missionary, NMM Mission, Andhra Pradesh
2. Mr. Chubatemjen, Sunday School Mobiliser, ABAM
3. Rev. I.S. Walling, Regional Director, HBI, Regional Center, Siliguri
4. Mr. N. Tangit Longkumer, Missionary Indo-Burma, NMM
5. Mr. R. Tali Imchen, Missionary, Zeme Baptist Association, Nagaland.
6. Mrs. Amenla MacIntyre, ABAM Missionary, China
7. Mr. Imliwapang Imsong, ABAM Missionary, China.

Fellowship ajak nung parnoki melentepa item onük jembia liasü-

- a) Tenyaba mapa kibong nungi tenzüker
- b) Temulungjang nungi tenlaba
- c) Sarasadem tashi nung akangshiba
- d) Osang tajung abenba tetsüng koda tobur tajung
- e) Tenzüksü agizükba terenemshiba

O jembirtem ajaki Tsüngrem O nungi dang masü saka pei taküm aser kibongi mission wadang nung ajurubatempa ajanga mission week sentong nung atenenertem tanelo temoatsü tulu angu aser mission mapa inyaktsü tayongzükba tulu ngua liasü. Parnoki ashiba ajak züludi süra aika lir saka amangbapurtemi angazüka aliba bilemtedaktsütsü nükjidong nung tongtipang o long kar tatsü agi agütsür.

**1. Temulungjang nungi tenlaba:** (I Putipuyang 29:10 – 15) Ibai tamaren Chuba Dawid sarasadem lir. Tsüngremi pa ajungket, rongsen moatsü. Dawid-i bilem Tsüngremi ni bilemba dang tali moatsüogo anungji Pai kü dang ajungba asoshi ni kechi agütsütsü. Tsüngrem asoshi tenla ki ka yangludi ta pai bilem. I Korint 9:6 – 14 nung Paul-i agütsüba indang shia lir. Pauli tenlaba aser agütsüba ana ya koda balala iba indang rateta ashiba angur. Ajak madak kiburji Tsüngrem. Paji tagütsüsang aser Teyanglusang. Kechisarena Tsüngrem nungi. Asenok meimchirtem Pai yanglubatempa dang. Shidi süra asenoki Pa nem agütsütsü kecha matoker kechiaser taküm, tangula, jala jabasotem aser asen akaba kiset shirurutem ajak Pa meyong. Paiang asenok nem kechisarena agütsür. Asenoki memeshibatema Pai agütsür. Idangji asenoki meyimlaba temoatsü Tsüngremi agütsüogo ta jembir. Asenoki pei taküm Pa nem agütsütsüba dak alaka tanga kecha mali. Anungji Paul Rom 12:1 nung “Adianutem, nenoki pei mang taküm tenla ka, temeshi aser Tsüngremi agizüktettsüsa tenlang” ta ashiba angur. Kodang asenoki Tsüngrem dang tenlar,





Pa atema asenoki merah ka aodang Pai merah 3 arur kechiaser tenlaba nung Tsüngrem pelar. Tenlabaji Tanel Temeshi-i asen taküm aser kibong nung mapa inyakba süngjang lir. Tenlabaji Tsüngrem meimba khuli. Asenoki tenlabaji dang masü saka tenlatsü mulungtetbaji Tsüngremi aginür.

Aji Pa taginüba tulutiba lir. Tanabuba nung, asen shisatsü Pa nem agüjang. Asenok Tsüngrem O agi mesepdaktsüdi aser asen mulungjang nung Tsüngrem nem jembidaktsüdi.

Mulungdok (Emotion) agi kecha teinyak. Asen akaba yari Pa dang tenla-ang. Na sensaker ka asütsü akok. Nai tera dang tenlaba agi Tsüngrem sensaker makümtsü. Mesüra nai tenla dang ne ali nüngdak tongtipangsüa tebilem. Kechiaser Pai nü nüngdak ajak metet.

Tenlatsübaji Tsüngremi mulungba. Tenlaba nung kodang Tsüngrem tama südaktsür, Pai mapa inyaker. Tatem nung “Tsüngrem dang tenlaba ya ne mulungjang Pa den sentaktepa aliba temaitsü lir”.

## 2. Sarasadem tashi nung akangshiba:

- \* Asenok aikati sarasadem ajanga Tsüngrem nem sayutsüngi agütsür.
- \* Yisui Gethsemane nung sarasadem nung Yihuda nunger otsü melenshi. Yisui Oba Ne mulungsang ta ashi aser kangki nung taküm bendanga agütsü. Parnoki ashir “Mesia kodanga timmatemtsüla”. Anungji tang tashi Yihuda nunger aikati Yisu magizüker aser aser Mesia ano maru ta ashir.
- \* Meimchir ajunga atema Pauli sarasadem. Anungji atakatema kin ta Yihuda nungeri züngshia aliba bendangertem-tetezü asenok dangi osang tajung aru.
- \* Martin Luther-i ashi, “ Ni kanga mazüng anungji anogo ka nung mezüngbuba gonda asem ni sarasademer”.
- \* Tanü Naga nunger sarasademer aika atokogo. Na aser ni sarasadem ajanga Naga nunger jenjang kong lir ? Tanü asenok kong lir ? Arogo nung asentensi küm shia agir saka sarasadem nungbo asentensi makai lir asü ?



Asenok sarasadem tashi nung koda akangshitsü aser kechiba akangshitsüla kar shisemmer:

- \* Mathi 9:37-38 - Alurudaki nübo yoktsü atema
- \* Kolosi 4:2 - “Sarasadema liang”. Yisui koma sarasademtsü, lumitsü aser Tanela tongpang koda raratsü nentaka sayu.
- \* Mathi 6:9 - Yisui nütsüngtem dang koda sarasademtsü sayu. Tenyar Paulia sarasadem nung akang akanga ali
- \* I Tesa 5:17 - “Maneni sarasademang” Sarasadem ya tamanger ka asoshi tanela

- chiyungtsü. Ne tanelia temabai ajungkettsü sarasadem dak alaka tanga mali.
- \* T.Ken 1:1-6 Sarasadem nung akanga lira ne tamangji ayongküm nung atemba süngtong ama asütsü.
  - \* Yohan 15:1 “Ni tezü aser nenok kongsangtem” Yisu dak tangloka alitsü asoshi sarasadem kanga tongtipang. Missionary ka asoshi nok o nü tajungtibaji sarasadem. Sarasadem masüba missionary kaji sepai ka nok o nü mebeni rarai aoba mesüka lir.

Anungji missionary arogo kaji tangar dang nungi sarasadem nung tali takangba asütsüla. Missionary arogo ka nung kibong shiaji sarasadema kibong asütsüla. Pei arogo aser kibong asoshi dang masü saka arogoi ayuba mission field nung tenzükertem. Mission field kübok aliba nisungtem, arogoi tesem balalai yoka aliba tenzükertem parnok ajak atema sarasademsü missionary arogo nung aliba purtem khuret lir.

### **3. Osang tajung abenba tetsüng koda tobur tajung:** (Isaia 52:7, Rom 10:14 – 15) Kotak nungi temeim aser tesünep bener arua sangoktsüsang Yisu. Tebur tajung tetsüng abensang Yisu. Shi aser tanelia nung tanepstsü bener arusang, osang tajung bener arusang Yisu. Pa dak tebur tajung tetsüng tapu 12 lir.

1. Temeim agi sünga aliba Yohan 3:16
2. Bendanga agütsüba Filipi 2: 6-8
3. Ajemaluba
4. Taochi Yohan 1:4
5. Taremzük Mathi 26: 12
6. Ochi nung noktakba Yohan 18:37
7. Ajak den saku Mathi 4:15 – 16
8. Tatitang koktetba Mathi 4:1 – 11
9. Aria bilemba
10. Tasü tait Yohan 18:37
11. Sarasadem tashi nung akanga noktakba tetsüng. Mt. 26:36
12. Laishiba atalokdakstsüba tebur tajung tetsüng.



Temeim adianu, Yisu Khrista mapa nung shilem agir shia dak item tebur tajung tetsüng 12 ji tendakstsüner. Tamanger ka dak Yisu dak aliba tebur tajung tetsüng melira mission wadang abensa-a meinyaktettsü. Laishiba nung ashiba ama alima kin ajak dangi osang tajung takok ngua bener aotsü asoshi tamasa asenok dak item tebur tajung tetsüng 12 lidakstsüdi ta ayongzüker.

### **4. Tenzüktsü agizükba terenemshiba: ( Mathi 28:16 – 20)**

- \* Tenyaba iba ya angatettsü kanga temela. Asenoki tanur, mapa tila ka inyakstsü tenyar. Anasa aliba tesem kari parnok tenyai yoker. Tenyaba mapa nungi shiangia atsüka melitet.

Yisu nütsüngtem parnok alima jenjang asenoki meteta lir. Yisu kangki nung masü tashi parnok anir jaja. Pai parnok dang kotak yimli indang, meimtsü, tila akümtsü aser ajemalutsü ashi. Saka parnok rongnung, bangsentepba, tulu shisangnuba liasü. Saka parnoki tashi



angaa Yisu sülen anitak. Asenoka Yisu nütsüng ama tashi mait agi sünga lir. Tenzüktsü renemshiba nung tashi angaba kanga tongtipang.

Asenoki pei tanelan jenjang junga kümerang Tsüngrem tenzüktsü bilemra nai kodanga metenzüktettsü. Tsüngrem tenzüktsü asoshi na akaba rongsen aser sempet dak temulung telem. Tsüngremi mulungba dak nai ranglokang. Nai tashi dang angara ne dak Tsüngrem mapa jungkai atoktsü. Tsüngrem wadangji tendanga inyakba (trial basis) mapa masü. Nai Tsüngrem asoshi kechi tajungtiba inyakteter. Nai temulung teindang agi Tsüngrem tenzüker asü masü. Na akaba agi Tsüngrem tenzükang. Ner arogoi mission wadang kodaka inyak ta masüngdangtsü saka Yisi nai kechi inyak ta asüngdangtsü. Nai tashi angara sayatenya aser nüngdak ajak ne sülen anidaktsü. Tenzüktsü renemshiba nung sarasadem ya tamentakdak lir. Sarasadem ajanga nüngdaktem nai angutsü.

Tamasa ne taküm, rongsen, sempet Tsüngrem nem bendanga agüjang. Sürapang, tenzüktsü asoshi tanüngba mapa ajak Tsüngremi renemtsütsü

. Mission wadang nung parnok taküm aser kibong ajurubatem kar mission week mapang missionarytemi lemsatepa liasü. Itemji amangbapurtem temoatsü angutsü nükjitolong kar agütsür.

1. **Rev. I. S. Walling:-** Ozü kibong Siliguri-i or kulen kübu aser kütsü na ozü kibong semdangi aru. Iba mapang onok 10x10 taktang ka nung liya liasü. Aser ita ka nung rent sen 1500/- ajia ita 11 tashi magütsüteti liasü. Kübu temulung kanga shirang. Anungji yangi nenok yamai timtema teli. Asenok kulemi yimtaki odi. Ni ner kibong mesütsü aser ne nem ni ita sen meyirjang 10,000/- agütsütsü. Iba jagi nai Tsüngrem mapa kechi inyakner inyaktsü akok ta pai kü dang ashi. Na marunera nebutsü aser tanurtem ni yimtaki anir aotsü ta pai kanga temulung raksa-a ashi. Idangji kübu dang kübutsü, "Oko kübuba den küleme timatemtsü ni nangzük anungji ni marutsü" ta langzü.



Aiben 3nü tashia mechiyungi liasü. Taya agi tanur aonung tepiyong ajep.

Aji angashia ki kibur Sharma, shiba Brahmin liasü pai ayatrem nung parnok chiyunger anüngba chisüng bener arua kü nem agütsü. Iba nungji metsü aser tzü tatsük enoker ozü 3 lemsa-a achi. Chiyungsü makaji ni Tsüngrem mapa meinyaktsü asü ? Tsüngrem lir nung ni kechiba shisa bulutsü Pa mapa inyaktsü asoshi rongsen atatsü asü ? Yamaji kodanga masü ta kü nem tangatetba agütsü.

Ano mapang kar nung amtsük (bread) ka alir aji asemsü küma lemdanger anasü tetsü aser tanur nem yutsür shilem ka (1/3)abentsü. Iba den tzü bottle ka bener anogo tepiyong jajaba mamar. Ni atema ibai mapa kanga tasak liasü.

Siliguri nungsa muslim nunger ka kidang azü tulu ana asem ka liasü. Kenü par kima tonga or Yisu indang ne den jembidi ni ta pa dang asüngdang idangji pai oatokang ta kü dang ashi. Aser tanemi azüji chiok. Idangji azüji kündak ponglok. O meyiper ka kü den liasü. Tetsübü agi pajii jena oatok. Ni jena motet nung sarasadema noktaka ata. Azü kündak menaktsü tenzük. Azü ajak jagi kü den asaya. Kiburji aoksa. Pa kidang nungi alu aser Tsüngrem O anga. Nikongtsütsü 5 baji meta pa sasa temokok agi ali nung aputaker Yisuji shitakba Tsüngrem, ni Pa agizükdi, ni atema sarasademjang ta kü dang ashi.

Aonung sangwa-a Tsüngrem tenüng sanga ni ajep. Kü tepela nüktü ni mesoettet. Iba mapang nungi Tsüngremi kü dak sayatenya inyaktsü tenzük.

\* \* \*

2. **Mrs. Onenlemla:** (La Tuensang Ao Baptist Agoro nung tetsür Tesayula inyak. Saka kibong kümer kulen Andhra Pradesh nung oa tebuba den mission mapa inyaker.)

Ozü kibong Andhra Pradesh nung tzüyim kümpang nung ango apurtem rongnung mission mapa inyaker. Kenü kübuba yim kati sentep nung atentsü Bus ka nung ao. Sentep temer kidangi meyipa arutsü Bus bushia ao nung busji oatoker liasü. Par yimtaki iba busji anepdang aor aser nikongtsütsü meyipa arur. Par yimtaki aotsü aser arutsü asoshi tanga gari mali. Joko tanga teimla kecha mali nung tetsüng agi kilometre 35 jaja-a aru. Ki atong dangbo ayatrem 1 baji liasü. Idangji ni kechiba na menur arur ta pa den rara aser anepalutsü melena ni mejangatok. Menur asü nung pa chi mechiyungi mejang. Anepdang pai bus oatoker aliba aser kilometre 35 tetsüng agi jajaba otsü ashidang kü mulung nung kongshi. Ni Aolijen nung azüng dang Tsüngrem dang nangzükba bilemteta jebjen ajeb aser kübuba dang tatok meshi. Ajisür külen tali bendanga agüja-a mission mapa inyaker.

\* \* \*

3. **N. Tangit Longkumer:** Kenü anogo ni U.P. nung alidang Hindu nunger ka ni bushia aru. Aser ashi, Ozü chang (buffalo) tetsüti anogo 3 buba tepoki maor aser chiyungtsü kecha machir, tasütsüsa shirangdar. Anungji nai sarasademjang ta kü dang ashi. Iba changi mamatsü agütsüba ajanga ozü kibong ajunga mesür. La süatokra ozü kibong atema rongsen lenmang kecha makatsü. Idangji, ni UP-i aruba ya chang anepalutsü atema masü saka mamangertem Khristan kümdaktsütsü aru ta ni bilem. Joko koda masü, ni chang kibur sülen anidaka ao aser chang dakji nemeter Yisu tenüng nung changdak aliba tashitak anepjang ta mimshia sarasadem. Ni sarasademba mapang chang kibur dena nisung 5 ni anasa noktaka liasü. Parnoki ashiba agi ni sarasademba mapang nisung ka süoshi temesüng subor temalen nungi alua changdakji kongshiba angu. Kodang ni sarasademba atem chang jagi ola tulu atok, tepoki ao aser sakha noktak. Iba sayatenya ngua ni sarasadem dang ni anasa noktaka alirtem par 5 prongla temulungjeng meyipa Yisu agizük.

Iba kümji New Delhi nung World Missionary Conference ka liasü. Yangji Rev. Dozo tongti o jembir liasü. Ajungbena chang kibur nem taküm khuli ashitsü mapang agütsü. Pai UP nung changdak kechi atalok iba otsü ashi. Iba conference nung atener ajak ali nung aputak aser iba sayatenya asoshi Tsüngrem nem tenüngsang agüja-a sarasadem.

Kodang asenoki Tsüngrem dang temulungjang ajak agi sarasademdir Pai sayatenya inyaker.



# KABA GENERAL MISSION MINISTRY 2017 OSANG



Rev Arenla Longchar,  
Associate Pastor, Mission Ministry

**E**zekiel 34:16 nung yamai ashir, “Koba sama-a liasü ni bushitsü, aser aridoka alibaji ni tanaben anir arutsü, aser yiruba zübu ni alenteptsütsü, aser tashi maiter tashi itshidaktsütsü; teyira aser tashi aiter ni reprangtsü, ni parnok ochishiba agi mesütsü.” Taküm küm iba laishiba O agi kü den kanga jembi. Iba laishiba tekong ajanga kü tenzükba mapa ni koleni anidar aser ni kechi inyaker ta maneni kü den jembi. Anungji Mission ministry ajanga taküm melenshidaktsütsü aser nüngdakbapurtem yaritsü ni jangra. Iba nükjidong nung sama-a aliba purtem, yirua alirtem aser tashi maitba purtem tongtettüsü asoshi teküpoklen aguja-a aliba sentongtem küm tsüngda inyak. Külem tenzükertemi agütsüba osang nung ashiba mapatem mapang kümzüktsü atema ni melephshir.

**I. MISSIONARYTEM:** Asen Arogo züngsem nungi missionary 13 item tesemtem nung mapa inyaktaki. National missionaries – NMM ajanga yokba NCF Pastor 5 item tesemtem nung lir. Naga Christian Fellowship Dehradun, Mumbai, Mysore, Aizawl. Parnok rongnung Sakurepba aser par kibong KABA Youth ministry nung inyaktsü asoshi September ita NCF Mumbai nungi meyipa aruogo. Assam aser Arunachal Pradesh nung missionary ka ka yoka lir. International missionaries – Thailand nung missionary 6 aser Uzbekistan nung missionary kibong ka oa lir. Mission partnership ajanga Evangelists aser Pastor 15 nem ita sen agütsür. Parnok Ahmednagar, Uttarakhand, West Bengal, Assam, Arunachal, Nepal aser Nagaland nung lir. Missionary care sentong ka yanglua, National missionarytem asoshi Dehradun nung June ita retreat liasü aser Thailand nung aliba missionary 6 asoshi kesa sentong ya August, 2017 nung liasü. Item sentong nung o jembirtem OMF nungi jaok. Katimenla Imsong (Longmisa) Thailand nung missionary tesayur inyaktsü asoshi September 24, 2017 nung mapa nungloksüba sentong liasu. Missionary David Walling (Khar) Uzbekistan aser Lanuyanger Ozükum (Süngratsü) Silonijan, Assam tena nem ABAM-i Christian ministry license October 22, 2017 nung agütsü. Amenla Longkumer (Longjang), Kathmandu nungi Tibet nunger rongnung missionary inyaktsü asoshi November 26, 2017 nung mapa nungloksüba sentong liasü.

**II. KABA GRANTS, THEOLOGICAL & SECULAR DEGREE SCHOLARSHIPS:** A B A M Mission Resource Mobiliser ita sen teyari küm nung ₹.100,000/- (Rupees one lakh) agütsür. Kesa teyari Great Commission Thailand nema agütsür. Theology azüngertem 20 nem scholarship agütsür aser parnok rongnung nisung 2 nem full scholarship agütsür. Item theology azüngertem shirnoksa scholarship agizüktsü arur parnok den jembi dang parnok tanela jenjang angatettsü aser yaritsü meranger. Parnok 20 rong nungi nisung pongobo missionary inyaktsü Tsüngrem nem bendanga agüsüogo. Ano secular azüngertem nisung 5

nem scholarship agütsür.

III. Nagaland Mission Movement aser ABAM densema mission partner 9 den yaritepa KABA-i mission mapa inyaker. Parnoki yokba missionarytem asenoki yaritsü akok mesüra parnok mission field nung inyaktsü asoshi asenoki missionarytem yoktsü akok. Ano tsüngtong tenyaba mapa inyaktsü KABA nungi telok balala mission field-i yoktsü akok. Tanü mission partner meteni tenyaba mapa tulu asenoki meinyaktettsü.

#### **IV. HOME & OUTREACH MISSION:**

A. Dudu Colony Outreach Ministry, Dimapur & Assam aartsü – Idaki evangelist ka yua lira aser pai kipoksem mapa kanga meranga inyaker. Taküm küm nisung 17 Khrista agizüka temulung meyip aser parnok rongnung 11 tzü nung tzüsenogo. Deobar temoatsü sentep dak alaka tamangertem kulemi sarasadembä aser Lai bushiba sentong akar. Amangba purtem tamang nung tashi ita lidakstsü asoshi Khristian Taküm omen nung anogo ka atema seminar liasü. Laishiba angazükdakstsü asoshi Deobar pezü tashi maneni tesayuba balala agütsü. Schooli maor tanurtem atema Learning Centre lapoka lir aser taküm küm February- November tashi nung tanurtem 99 shi aruogo. Iba centrei tanur teimba aruba ajanga parnok acha-ayangtsü asoshi teyariteper ka part time inyaktsü shimogo. Telok ana lemtanger sayuba ajanga class nung sayuba aser tanurtemi angazükba kanga tajungba kümogo. Tanurtem küm asem tashi maneni class-i arurtem nem certificate agütsür. Aser iba sentong nung tsüraburtema atentsü jaoker. Iba sentong ya parnok dang Tsüngrem O ashitsü lenmang tajung ka lir. Iba sentong Khristmas matong dang alir.



B. Kohima Bengali Outreach Ministry – Kohima nung Bengali fellowship tenzüker joko küm ka abensaogo. Iba fellowship ya Deobar shia KABA main church nung akar aser züngsem 50 nungi 60 tashi arua atener. Parnoka Sunday School kanga junga agidar. KABA nungi Abenla aser Arensoba tenati Sunday School kanga junga sayur aser tanur 10 shi arur. Dr. Watijungshi aser kinungtsü Alice Walling tena ajanga Khristian Kibong Seminar sentong ka agütsü aser nisung 80 shi aten. Parnok asoshi ibai Khristian kibong acha-ayangba nung tenük lapokba mapang ka liasü.

Arensoba & Abenla yamai ashir, “*Bengali Sunday School class September ita nungi*



*tenzüka kanga dang temoatsü nung agia arudar. Tang tashi nung, tanurtem ajak agi parnok metsür ana (22) lir, aser parnok Class-A nungi Class-8 tashi nung azüngertem lir. Item tanurtem, Khrista nung aintsü atema sunday school class tenzükba ya kanga dang tongtipang asernungdakerta angateter.*

*Tanurtem teimba ka indang tsürapurji, kin temeyoktep nungi, aser parnok taküm nung Yisü Khristaji Kümtetdakba ta ano mejangjai alirtem aika lir. Anungji, item tsürapurtem atema aser talisa tanurtem asoshi khuret tulu lir ta lemsateper.*

*Anungji, mapang ajak nung tamangerpurtemi maneni sarasadema nungittü mepishir."*

C. Garo Baptist Church, Kohima – KABA-i ita shia deobar tasembuba tenzüker balala Garo Baptist Arogoi yoka parnok Tsüngrem O agi mesür. Iba ministry ya tenzüker joko küm 6 dak tali lir. Par arogo November ita Silver Jubilee among dang KABA-i tenla ₹ 60,000/- ( Meyirjang roker ) agütsü. Ano Jubilee choir yaria liasü. Jubilee mong nung Rev. M. Asangba Longkumer aser Eirene choir-i shilem tajung agia liasü.

D. Literary Ministry – KABA-i 2011 nungi 2017 tashi nung Arogo 35 nem arogo library atema kaket agütsü. 2017 küm item Arogo 5 nem arogo library atema kaket agütsü. Kupza Baptist Arogo, Aitlenden Baptist Arogo, Peren Baptist Arogo, Saring Baptist Arogo, Satsükba Baptist Arogo



E. Eastern Naga Church Leaders Training – KABA-i anepalua JMC nung iba training liasü. Eastern Naga Arogo balala nungi tenzükertem 130 arua aten. Iba sentong asoshi nüngdakba rongsen ajak KABA-i agütsü.

**V. MYANMAR NAGA PROJECT :** Kaisen association nung lenir 3 nem KABA-i ita sen agütsür. Ano Govt. School Donghi, Myanmar nung azünger kaketshir 10 yarir. Item kaket shir 10 ya arogo balala nungi teshimtet kaketshirtem lir. Myanmar Naga nübortem atema tatitang tulutibaji hon lir. Tesasatsüka asen arogoi yariba kaketshir 10 rongnung kabu kaket riju nungi jena oa Khamti nung aliba hon atudak lir ta ashir. Mon aser Arunachal atener oa aliba Myanmar Naga nübor aika kanga timtema lir. Anungji arogoi parnok atema teti aria bilemtsü aser yaritsü ni sarasademer.



Nukshom, Class 4, Age 14



Shanwah, Class 3, Age 14



Shanrungh, Class 6, Age 12



Shannong, Class 4, Age 9



Muishak, Class 6, Age 12



Bahn, Class 4, Age 14



Muishak, Class 5, Age 13



## KABA EVANGELISTIC COMMITTEE- 2017 OSANG



N. Wati Atsongchanger  
Convener

Amangbapurtem sarasadem teyari ajanga 2017 KABA Evangelistic committee-i arogo nung aser Kohima adener oa tanga nung inyakba osang tatsü agi agütsür.

1. Sector ajak nung küm tetenzüklen sarasadem agir committee mapatem tenzüka ao.
2. Anogo ka apuani retreat sentong tajung Mr. N. Lipok Jamir, Pastor ajanga agia liasu.
3. Sayutsüngi mapa lemteta akaba ama Dimapur area nung item Nagamese Baptist arogotem semdang - Burma Camp Gorkha Baptist Church, Gautam Basti Karbi Anglong, Nagamese Baptist Fellowship Thahekhu, Nagamese Baptist Church Ura Villa. Mokokchung district nung Longkong Baptist Arogo aser Chakpa Baptist Arogo semdang.
4. Küm tetenzük nungi October ita tashi, Arogo telongzük nung kibong sema sarasadem den külemi Evangelism mapa inyaka liasu.
5. Mission Department ajanga nungloksüba ama KABA Mishmi Agape Mission firld Arunachal nung küm tsüngda aseben tashi Revival aser Healing sentongtem agia liasu. Iba field nung Tsüngremi mapa tulu inyakdagı.

August 25-27, 2017, Sayutsüngi Committee nungi nisung 15 tashi luagi asen arogo mission field Mishmi Agape Mission, Arunachal Pradesh, nung revival cum healing crusade takok ngua agi. Iba revival sentong nung arogo ajak agi 6 nungi arua tena liasü. Itemji 1) Lamliang Baptist Church, 2) Namgo Baptist Church, 3) Manyuliang Baptist Church, 4) Phukre Baptist Church, 5) Medo Baptist Church, 6) Manyuliang Revival Church aser ano 3 house fellowships nungia tena liasü. Itemji a) Mawai house fellowship, b) Karhe house fellowship, c) Kamlangnagar house fellowship. Item denji ano Mishmi Baptist Church Council nungi President, Executive Secretary anir parnok pezü tashi arua shilem tajung agia liasü. Tetzüraba aser teyongyaba tulu nung amangba pur ajaki sarasadema ataba ama tsüngtsang mepong tajung den tensa ajak tajungtiba nung azüoka Tsüngremi semdangba ajanga datener ajak pei tamang yari temoatsü agiba mapang den ano shi nunga tanepstsü jenti ngua liasü. Kechiaser



*Evangelistic Committee mezung team*



**MAM Healing Crusade- Dr. Alemwabang**

Adhivasi nunger mamanger nisung ka paralyze sur bener aruba Tsügremer taneptsüba ain ajanga tajungba kümér ao. Ajak dak alia temoatsübaji mamanger parnok nisung 27 tashi arua sentep nung tena temoatsü agia liasü. Itemji yamai agütsür – 1) Mishmi nunger nisung 8, 2) Nepali nunger 7, 3) Adhivasi nunger nisung 6 tashi arua agi tena liasü.

Tamangertem rongnunga talila bendanga agütsüshiba mapang tajung ka deobar nü devotional sentep nung agia liasü aser tamanger rong nung ter shilem shitak magütsü-i alirtem nisung 21 tashi agi tang nungibo alu nungi züsentetba kechisarina nungi aser anogoshi anguba sen nungi Tsüngrem meyong ter shilem shitak agüja Pa külemtsü tenanggzükba tulu agia liasü.



**Second team of Evangelistic Comtt Aug 2017**

November 10 – 12, 2017 Mishmi Agape Mission Revival and Healing crusade osang tatsü agi yamai agütsür. Arogo 5 (five) nungi amangbapur 280 dak tama sentepa kanga dang temoatsü ngua liasü. Talisa Christian Revival church aser Fellowship 2 tashi arua iba revival sentong nung temoatsü agia liasü. Mamangertem parnok nisung 13 tashi arua tena liasü.



**Third Evangelistic team MAM healing crusade nung shilem agirtem**

onok rongnung Dr. Alemwabang den nurse adianutsür Atemla tena ajanga nisung noklang ana tema temang repranga medical treatment balala agütsüba den mozü lema agütsüba ajanga jenti pur temoatsü agia liasü. Sentep ajak agi terok tashi agia liasü aser sentep shia bendanga agütsüshiba den healing service anaben tashi ayonga agia liasü aser tesenteper ajak pei tamang yari taneptsü tapu balala ngua liasü. Talisa

*Tekülem mapang**Shiranger atema sarasadembä*

angai arütsü tamakoktsü asünungji parnoki anüngdang inyaktsü melena züngia lia saaka 2:00 A.M. nungi 8:00 A.M. tashi mapa inyaker külen Revival lagi arua anogo tepiyong tener aonung meyipa oli ta asüba khuli angudang onok taortem ang tali temoatsü ngua liasü. Ano tatalokbakaji Namgo Baptist Church nung revival akatsü asoshi tazüngla nungi tenzükba tamangertem temulunger tenla agi dang sentong tulu takok ngua agir ajak agi ₹ 19,240/- anüngba khuli aguja liasü, aser iba tejangji tanabuba revival mapang ter shilem aser Tsüngrem dang koda tenlatsü iba indang tesayuba agüja tenangzükba agitepa, Tsüngrem dang azüngashiteper senshiba tejang atanger ta Mission Co-ordinator ajanga khuli tejangja agüja liasü.

Taküm küm tepiyong nung asemen tashi asen mission field nung revival sentong sayatenya jenti tatalokba lia Tsüngremi kanga dang moatsüogo. Pa tenüng sangdi, ajak dak alia luagi alir amangpapurtem asoshi asenok ajaki teti sarasadem nung bilemtetdi ta ayongzüker.



## 2017 SARASADEM COMMITTEE OSANG



Mr. S.Rongsen

**T**amasa Kohima Ao Baptist Arogo (KABA) Sarasadem Committee ajanga küm tepiyong inyaka aruba osang mashi dang ni aser ozü kibong den Sarasadem Committee-pur ajak tenüng nung Khrista temeim salem den asen jakdang aru-ya aliba Khristmas tepela salem amangbapur ajak den lemsateper.

1. Küm tepiyong kiyong ajak nung mezüng Bodhbar aonung Sarasadem sentong Committee-i acha-ayanga agia arudagi.
2. January 22, 2017 (Sunday) KABA Chain of Prayer mapang -6:00.a.m nungi 9:00.a.m ayongzüka aliba mapang nung Committee züngsem 30-i shilem agia liasü.
3. Küm tsüngda nung Block Leaders/Asstt. Block leaders senden 5 ben mena liasü.
4. February 19, 2017 (Sunday) Committee-pur Orientation sentong Main Church nung 4:00.p.m nungi kha liasü.
5. February 24–26, 2017 nung Sarasadem Committee züngsem 18 Mishimi Agape Mission Field-i (Arunachal Pradesh) tsüngdong oa yimtsüng aser town tesemtem nung mamangertem atema Yisu Khrista agizüka amangdakstsütsü asoshi sarasadema tesem 15 tashi nung jaja liasü. Tematiba Tsüngremi par nübor mulungjang nung mapa inyakang ta aser asen Mission Field asoshi temoatsü meshia sarasadem sentong tajung agi aser temüket arogo 3 tashi nung Yisu Khrista Osangtajung bera liasü.





6. Ano April 22, 2017 nung Sarasadem Committee Prayer Walk Dimapur-i lua liasü. Iba sentong nung committee züngsem 94, Bus 3 nung alu aser item tesem 7 tashi nung oa sarasadem agia liasü.
- 1) Nagaland Gate( near Amar Rice Mill, Dimapur)
  - 2) Nagaland Gate( near Indisen Colony, Dimapur)
  - 3) Railway station, Dimapur
  - 4) Bakala ayong( near Patkai Bridge, Chumukedima)
  - 5) Chumukedima Gate.
  - 6) Peducha Gate.
  - 7) Bye pass Gate.


Yisu Khristai item tesem ajak nung mapa inyakang ta khanga sarasadem aser nübortem mulungjang shia nung Ochi pükümer tasütait adokdakjang ta ajang-ajanga sarasadem

7. June 3<sup>rd</sup> nung committee-pur Re-treat sentong tajung ka JMC nung liasu.





8. August 17<sup>th</sup> nung Committee-pur Telongjem Fellowship sentong tajung yanglur takok ngua agiogo.
9. Kum tsüngda nung shiranger timtemer kibong 324 dangi oa sarasadem nung yaritepogo.
10. Ano iba küm nungdaka jaoker kibong 57 dangi oa sarasaden nung yaritepogo.
11. Ano küm tsüngda nung tasür kibong 53 den khuret lemsatepa sarasadem nung yaritepa liasü.
12. KABA kimoker ministry nung 35 ben tashi oa Tsüngrem Osang tajung bema sarasadem tajung agia aru.
13. Asen KABA nung class 10 aser tema tatidang agütsürtem parnok 170 tashi dangi oa sarasadem nung yaritepa liasü.
14. Committeepur-i Prayer Walk küm tsüngda nung tesem 81 tashi-i oa sarasadem takang agia aruogo.
15. Free Health Clinic kiyong balala nung alidang Committeepur-i metitem-i yaritepa aruogo .
16. Küm tepiyong NBCC Intercession Net Work akadang KABA tenüng nung Committee züngsemtem oa aten.
17. Iba küm, Committee rongnung Tsüngremer sempet akaba nübo tajung ka Late. Mrs. Putuienla (Molungkimong) Bayavü Fellowship nungi Kibubai jar oadokogo.
18. Iba küm term agi tonger sodi agitsü-pur nübo tajung nisung 22 lir, asen Teyanglur Tsüngremi ano maneni Khristar wadang asoshi tali dang parnok ajak ajungketa amshiangma.
19. Item ajak dak alaka KABA-i kechisa nungloksü itemji committeepur-i inyaka takok ngua aruogo, ya tanga kecha masü saka amangbapur arok sarasadem teyaritep ajanga takok ngua inyaktetogo ta ajak dang pelaba lemsateper. Tsüngremi iba osang azünger ajak moajangma.



# 2017 WOMEN MINISTRY-I MISSION MAPA NUNG SHILEM AGIBATEM

Rev. Yashila Jamir,  
Associate Pastor, Women Ministry



Küm shia Women Ministry-i mission mapa nung shilem tajung agia arur. 2017 kümä mission mapa balala nung shilem agitsü Tsüngremi maongka balala lapoktsü nung Pa tenüng asanger. Taküm inyaka aruba osang tatsü agi lemsateper.

## 1. Holistic Ministry:



*Holistic training*

Asen Arogo atena oa tanga kin arogotem Yimchunger Baptist Church (August 11 & 12) Kiyim lanutsür 70 nem aser Sangtam Baptist Church (October 20-22) kiyim lanutsür 35 nem Holistic training agütsü. Iba Training nung Khristan kibong ka nung tetsü ka teinyaktsü, ki kima kilong koda merüka tiptema ayutsü, yimya awashi tajung tesayuba agütsü. Iba den repsema sü mejepa süoshi arütsü, naro metentsü, sorochioktsü aser amtsük yanglutsü sayu. Iba kesa tesayuba asen KABA Bayavü kiyim lanutsür 35 nem October 13 & 14 training ka agütsü.

Ano ABTM Girls hostel Dimpuri lúa “Striving towards better living” omen nung ajemdaker College-i aoer tetsür hosteller 53 nem training September 1-3 agütsü. Iba training nung Bible study, Khristan taküm libaliroyim, yimya awashi, temang merükmejutsü, sü mejepa süoshi arütsü, naro metentsü, Cake aser amtsük yangluba sayu.

**2. Tenzükla Leadership Training:** Women Ministry sentong aser maparen ajak nung Tenzüklatemi nungita yarir. Arogotsür Ministry balala nung aser Arogo yangerba nung shilem tajungba agitsü asoshi Tenzüklatem asoshi Leadership Training August 11 & 12 agütsü. Iba sentong nung tenzüklatem 82 tena liasü. Resource persons Rev. Arenla Longchar, Mrs. Elizabeth, Mr. A. Moa Longchar & Mrs. Asenla Akang liasü. Tesayurtemi Christian leadership, Money management & networking, Grooming, Communication skills & Personality development onük



*ABTM hostellers training*

nung ajemdaker tesayuba tajung ajanga training nung atenertem tangazükba tulu ngua liasü.

**3. Home visitation :** Tenzüklatemi Arogotsür sentong balala nung nungitba dang masü, saka pei kiyong aser temeket nung timtemer, nüngdakbapur aser tasütama ajuruba kibongtem semdanga sarasadem agi yaritepa arur. Küm tepiyong tenzüklatemi iba ministry nung shilem tajung agiba ajanga nübortem aika tanel a tajangzük anguba khuli aika lir. Iba den repsema ABAM Clean Election Campaign nungita tenzüklatemi KABA kübok kibong ajak dangi tsüngdong oagi temepishiba sangdong shiti ka den ABAM-i yokba pledge card bener sarasadem agia tayongzükba agütsü.

**4. Learner's Cell :** Iba Ministry kübok sentong asem (3) agia liasü

**5. Kiyim Lanutsür:** April- May tsüngda anogo 8 agia kiyim lanutsürtem 25 nem Khristan Kibong ka yangertsü asoshi tetsü ka teinyaktsü asoshi tesayuba balala agüja liasü. Iba cell nung Christian Education, Good Parenting, House Keeping, Health Education, Nutrition, Mother's craft, Etiquette, Cooking & Baking sayu.



*Baking class*



*Yimchungru B. C.*

**6. Baking & Dessert Special Class May 12-14:** Iba training ya shirnoki cake & dessert teyangludak lir parnok 16 nem agütsü. Nükjidongji meteter inyaka aliba ano tali tajungba angazükshitsü aser mapang shia Arogo nüngdak mapang parnok nungi teyari agitsü atema iba special class ya agütsü.

**7. Jebijang Project:** Alima rongsenren ajema akümba aser kechisarena jenjang kanga tasakba akümba putu ka nung asenok alir. Aonsotsü mela mela pei kidang nungi adoka chitetsusa ajungshitsü nükjidong nung iba project inyaka arur. Iba project ajanga tetsür 57 enrolled süa parnok nem vermi compost, poly bag aser tsünatsü atema Raja mersü, repchi, dhania & pudinia agütsü.

**8. Teyari agütsüba:** Rev. Dr. Noksangla nem teyari ₹. 5000 ita shia agüja arur.



*ABTM Girls Hostellers' training*

# CHRISTIAN EDUCATION MINISTRY OSANG



Mrs. Alice Walling,  
Asso. Pastor, Khristan Education

'....Aser alima tatem tonga nenok kii kulitem asütsü' (T. Mapa 1:7)

**Y**isui nungloksüba mapa ya tulu tila ajaki inyaktsü tetuyuba lir. Iba tangatetba nung küm shia tila tanurtemi arogo mission angatetsü, shilem agitsü aser tarutsü nung parnoka Yisu meima kong lidir Yisu asoshi alitsü tesayuba agütsütsü meranger. Iba tangatetba nung inyakba mapa kar:

1. Sunday school aser Child sentep nung Mission indang lesson renema sayur.
2. Küm nung khen mission atema tenlatsü lapoktsür. Iba tenla bendenba nungi mission mapa inyaker. Taküm küm tila tanurtemi agütsüba tenla ajak agi Rs. 76,714 liasü. Iba tenla nungi tongtibang mapa ana inyak:
  - i. Arogo mission ajanga scholarship nisung ka nem agutsü.
  - ii. NBCC Education and Communication Board ajanga asüngdangba ama NBCC kübok aliba mungdangtem nem Bible Camp koda akatsü tesayuba agütsüba den iba sentong sponsor asü. Iba training nung item mungdang nungi tena liasü.

ABAM	-	4	ABCC	-	1
CBLT	-	4	KBBB	-	2
KBCA	-	3	LBA	-	3
PBCA	-	3	PBCC	-	3
SABAK	-	3	SBAK	-	3
YBBA	-	3	ZBCC	-	4
RBCA	-	1			

Naya Jeevan Baptist Church - 1

CCF Jotsoma - 2

Training nung atenertemi lemsatepba kar:

- Tenük lapokba mapang ka.- Mr. Kenungulie ABCC
- Osettsüset den teinyaktsü aika angazüker aor.- Ms. Khuchung ES, PCCA
- Kechiba tanbo Registration mali ta bilem nung KABAi sponsor asü.- Mr. O. Yanngang ES PBCA



3. Liangmi Association teachers training ka arogo mission ajanga sponsor süa asen arogo nungi tesayurtem oa training agütsü.
4. Child tanurtem aser tesayurtemi arogo tila kar semdanga khulisüba mapa inyak.

30<sup>th</sup> July aser 6<sup>th</sup> August 2017 arogo 7 (seven) tashi semdanga liasü.

1. Christian Union Baptist Church, Jotsoma
2. Nagamese Baptist Church, Naga Bazaar
3. Nagamese Baptist Church, Para-Medical
4. Nagamese Baptist Church, Pezoucha, Secretariat area
5. Ekletos Baptist Church, IG Stadium
6. Christian Revival Church, Merima
7. Baptist Church, Merima

Item sentong ajak ya arogo maongka nung tesayurtem aser tsürabur ajaki nendaka yariba ajanga inyaktetba lir. Nenok ajak dang kanga pelar. Yamala mapa tila ka tanurtemi inyakbaji parnok taküm atema senti temoatsü ama rizunga yuogo ta ni amanger. Tsüngremi tanurtem ministry nem mangdang aser nükla tuluba agüja len aniangni ta tazünger ajaki sarasadempangma.

# 2017 KABA YOUTH MINISTRY

## MISSION REPORT

Mr. Jongponglemba  
President, Youth Ministry



Iba küm youth ministry ajanga inyakba tatsü agi yamai zülur:

1. March 11, 2017: NBCC Prayer Summit Tuensang sentong nung KABA lanurtemi shilem tajung agia liasü.
2. March 13, 2017: KABA Fellowship ajak nungi lanurtem atenshir Kohima Pedestrians over bridge merüka among.
3. March 24 – 26, 2017: Chuchu Town Baptist Arogo Youth Revival sentong nung KABA Praise Fountain Team nungi parnok nisung terok-i tetushi aser tekülem nung shilem tajung agia liasü.
4. April 1, 2017: Differently-abled Persons, Creative Art & Drama Ministry team-i acha-ayanga training ka tongti O jembir Mr. Daniel Thong (Jo Foundation Inclusive School kibur) jaoka agi.
5. April 27–29, 2017: DABA Youth Leaders orientation sentong JMC, Lerie nung alidang KABA Worship & Music Ministry team nungi tetushi aser tekülem agia liasu aser Mr. Tiatoshi Longkumer, Asso. Pastor, Youth-i Tsüngrem o jembia liasü.
6. May 5-7, 2017: MTBA Youth Revival, JMC Lerie nung alidang KABA Worship & Music Ministry nungi shilem agia liasü.
7. May 5-7, 2017: Wakching Town Revival sentong nung Pastor Sentisashi den lanur ter ka (11) KABA nungi aser Konyak Baptist Church Kohima nungi lanur asem (3) oa shilem tajung agia liasü. Iba Revival sentong asoshi KABA mission department-i rongsen agüja yari.
8. May 13, 2017: KBYF-i ayongba Clean City Project sentong nung Local Ground merükdang KABA lanurtemi shilem tajung agia liasü.
9. May 25-27, 2017: nung 31 Buba Ao Theological Association Triennial Inti Mungdang Longmisa sentong nung KABA Youth Evangelism & Social



*May 18-21, 2017, Wakching arogo nung KABA Youth ministry lanurtem revival, tebutem training aser aonung lokti atema sentep akia liasu.*



Concern Ministry team ajanga item ya mungdang mapang inyaka liasu:

- Mass cleanliness drive in the village.
- Provision of drinking water at the conference hall.
- Distribution of environment concern stickers and bookmarks.

Putting up of sensitization banners on the theme- Environment Care.

10. June 5' 2017: World Environment Day amongba anogo nung Social Service & Media Ministry aser Evangelism & Social Concern Ministry-i Kohima town nung PHQ junction nungi Civil Secretariate gate tashi Green Marathon Race sentong ayongzüka monga liasü.
11. June 9 -10, 2017: KABA Youth Sports Meet, Shiekhazou Ground Kohima nung saisapong balala fellowship ajak nungi lanurtemi shilem tajung agia liasu. Iba sports mapang Youth Evangelist-temi anir lanur tasentem den evangelism mapa inyaka liasü.
12. July 21-23, 2017: Praise Fountain Team nungi lanur tenet-i Naga United Youth Revival sentong nung shilem tajung agia yaritepa liasü.
13. September 9, 2017: Youth Ministry ajanga Kohima town nung Clean Election Campaign Street Ministry sentong nung Rally ka Old MLA junction nungi Heritage tashi jaja liasü aser Heritage Kohima nung Clean Election Debate aser Worship Night ka ayonga Kohima town nung aliba nübortem jenti arua shilem agia liasü.
14. October 25 – 28, 2017: KABA nungi pastor Tiatoshi Longkümer-i anir lanur 35 tashi oa Tuensang town nung KABA CARE inyaka liasü. Iba sentong Tuensang town nung aliba arogo 19 den longjemer anogo ana tashi Tuensang Town merüka, wall painting, health care marathon aser worship night ka ayonga Tsungremer temoatsü nung shilem tajung agir aruogo. Iba sentong den külemei Arogo 19 nem KABA CARE banner yanglua agütsü aser Chang Baptist Church Association aser CTC Aolijen nem dust bins aser tzü bottle tulu sempet agüja liasü.
15. November 18, 2017: Kohima Lerie Baptist Church aser Poumai Baptist Church asoshi asen KABA Youth ministry ajanga JMC nung Youth Leadership Training ka agüja liasu aser parnok lanurtem 40 (lir) shi tena liasü.

# MISHMI AGAPE MISSION

## MISSION COORDINATOR'S ANNUAL REPORT 2017



Tiamoa Yaden

T süngrem temeim aser Pa taochi ajanga taküm tajung nung iba osang agütsütsü maongka moatsünung Tsüngrem tenüng asanger. Ozü kibong aser külem tenzüker Charemnaro (Short term missionary) aser mission field nung amangbapurtem ajaki Yisu Khrista tenüng nung temeim salem abener. Asen Arogo nung Pastor aser Mission Directori anir külem tenzükertem aser amangbapurtem kija aser kibong ajaki sarasadem aser pei tajungtiba agi MAM wadang takok asoshi field nung tenzükertem den yaritepba aser shilem agiba asoshi kanga pelaba lemsateper.

Mission field nung taküm küm inyaka aruba wadangtem aser amangbapurtem sarasadem ajanga samaba tanelatem Khrista dangi anir aruba osang tatsü agi lemsateper.

### I. Mamangertem tamang nung Yisu Khrista dangi anir arua Baptism agatsüba.

Taküm küm tepiyong mamangertem dang osang tajung sangtongba nung kanga temolung agütsüa telok aser kijai inyaka aruogo aser mamangertem parnok 33 tashi tamang nung Khrista dangi arua baptism agütsüogo. Item baptism agütsürtem rongnung kin balala telemsa nungi yamai liasü: Mishmi- 8; Nepali- 9; Adivasi—16.

### II. House Fellowship Tasen Tenzükba.

Taküm küm Mishmi yimtsüng ana nung house fellowship tenzükogo. Item fellowship:



*Tiamoa aser Sonjong Minim kulemi MAM  
nung evangelism mapu inyaker*

**Mawai House Fellowship:** Iba house fellowship ya 1<sup>st</sup> January, 2017 anogo nung tenzük. Tamanger parnok kibong 3 nungi par 11 aser tila tanurtem lir. Yaküm Wakro area nung tangar missionary mali asü, anungji iba area nunga asenoki inyaka aru saka taküm küm nungi Wakro nung Angami Baptist Churches Association nungi Missionary ka arua lir aser MBCC ajanga joko Wakro areaaji ABCA ajanga reprangtsü lemzüktsüogo. Anungji iba house fellowship ya-a tang nungi parnoki reprangtsü.

**Karhe House Fellowship:** Iba fellowship ya 15<sup>th</sup> January, 2017 deobar anogo nung tenzük aser amangbapurtem kibong balala nungi parnok 5 lir.

### III. Tongtipang Sentong Palala Agia Arubatem.

A. KABA Sarasadem Committee Prayer Walk: 24-26 Febuary 2017 nung asen Arogo nungi sarasadem committee nung convener Shri S. Rongsen Ao aser Secretary Rev. T. Chuba-i anir membertem parnok ajak agi 18 tashi asen mission fieldi alua tesem palalai oa KIBUBAR wadang asoshi temoatsü meshia aser osangtajung yimtsüng shiai bener aotsü asoshi kishi sadema lapokjang ta sarasadema senzüa liasü. 24<sup>th</sup> February Friday anogo nung Kamlangnagar, Mikhetliang aser Medo area aser 25<sup>th</sup> Saturday anogo nung Karhe area aser Wokro nungi Parshuramkund tashi tua sarasadema senzüa liasü. 26<sup>th</sup> Sunday anogo nung telok asem lemsar Arogo asem Lamliang, Manyuliang aser Namgo Baptist Arogotem nung sentep tena Tsüngrem O lemsa aser shiranger tem asoshi sarasademja liasü. Parnok sarasadem temoatsü ajanga taküm küm kibubar wadang asoshi kishi satema lapoktsüa arudagi aser tanela jenti moatsüogo. Sarasadem committee nung lenirtemi anir tenzükertem ajak den pelaba lemsateper.

### B. Revival aser Healing Sentong.

Taküm küm asen mission field nung “Onok Asentenshijang” ta asüba omen nung ajemdaker revival aser healing sentong asemen tashi agia aruogo. Iba sentongtem asen Arogo nung evangelistic committee-i bendanga agia liasü. Evangelistic committee nung lenir Shri N. Wati Atsongchanger (Convener) aser Rev. A.Chuba Jamir (Secretary) tenati anir tenzükertem kwinaka timtem tuoshi ajak arema kibubar wadang tulu inyakogo nenok ajak den pelaba lemsateper.

Item sentongtem nung item onük nungi jembia liasü: Khrista ajanga tekümtet; Khristan taküm nung meshiteta aliba temoatsü; aser Arogo nung ter shilem aser pelashishia tenlaba nung temoatsü.

Item revival sentongtem nung mamanger ajak agi parnok 54 tashi tanebtsü bushia arua dena liasü. Jenti pur shi aser tanela nung tanepstsü angu aser item rongnung parnok 11 baptism agiogo, kar baptism

magi saka sentepi arudagi aser parnok den maneni nütsüngsüba mapa inyakdag. Tanebtsü angurtem rong nungi Mishmi nunger tantsürka kinungboji-a kokhan (Pujari) saka sentepi-ang sarasadem ajanga temenen tanelaji aridoktetsü ta sur anir aru, yamaji sarasadem ajanga temenen tanela aridoker tanebtsü ngur kanga junga lir. Adivasi nunger ka paralyze sur marakzüteti kinunger temi ajunger aru, sarasadem ajanga tanebtsü ngur tangbo pa sasa jajateta kümogo.

Arogotem nung amangbapurtem rongnung temesüpba chiyongtsü chia alirtem rongnungi parnok 32



*Kibong semdangba*



*MAM tamanger tasentem tzu nung tzusenba 2017*

tashi machitsü, majemtsü aser mayoktsü nangzük aser parnok rongnung nisung 17 tashi toktsüogo, tanüngba den maneni counseling agatsüa arudagi. Revival sentong nung temolung meyiper Namgo Arogo nung Nepali nunger tambur kati yi yoka liasüba sentep kidang mayoktsü nangzüker joko mayoker aser kanga junga melinshir lir. Mishmi nunger tamanger kibong asemi kaine lu mayemtsü nangzük aser taküm bo mayimer.

Arogo nung tershirem aser tenla magatsürtem jenti Tsüngrem O ajanga temoatsü ngur tenla aser tershirem agatsütsü angazükdagi aser iba süngjangji revival sentong aseben agia arudang temolunger tenla agatsüba ajanga jangja-a sayuogo. Mezung revival sentong asoshi temolunger tenla agatsütsü ajungshi saka kari dang tenla, anungji Arogo senpong nungi dang endok tanüngba mali asü. Saka tanabuba revival nung nuburi tajungba tenla agatsü, revival agir ₹ 7000 anüng. Tasembuba revival nung kanga agi tajungba tenla agatsü, local kibong anatibo ₹4000 aser ₹3000 agatsüa liasü. Sentong takok ngua agir ₹19240 anüng.

Item revival sentongtem agiba sullen mamangertema karibo nenok yamai sentong tajung agiba ya junger aser nenoki tesayuba tajung agatsür ta sa ashir.

### **C. One week Bible Study Sentong.**

9-13 April, 2017 nung area Pastor aser women leader tem mission compound nung Mission Coordinator ajanga 1 Yohan shitti nungi Lai tesayuba agatsüa liasü. Iba sentong nung tenzükertem parnok 8 tena liasü.

Iba sentong agiba sullen Pastortem shirnoki English aser Hindi Bible mezüngteter parnok nem parnok tejangraba ngua asen Arogoi Nagames Bible alia agatsü aser tang parnok kanga jangra-a züngdagı. Pei temoatsü anguba den külemi iba nungi Arogo nung tesayuba agütsüa amangbapurtema kanga temoatsü ngu arudar. Asen Arogo aser palaka asen lenir Rev. Arenla Longchar Mission Directori nüngdakba ajitetta yaritepba asoshi pelaba metetdaktsür.

### **D. Evangelism Training.**

Taküm küm area pezü lemsar Mission Coordinator ajanga Arogo nung lenirtem ajungshia evangelism training agatsüogo. Iba Training nung atener ajak agi parnok 70 liasü. Training nung atenertem kanga temoatsü nguogo, parnok aika kanga jangra-a tanela anir aruba wadang nung kü den yaritepa inyaktagi.

## **IV. Wadang Palala Inyakba.**

**A. Osang tajung sangtongba mapa:** Iba kum osang tajung sangdongba mapa nung kanga meranga inyaka arudagi. Mission coordinator aser local evangelist külemi longjemer yimtsüng temi oa kibong tem den metettepa osang tajung sangdongba wadang inyaka arudagi. Inyaka arudang junga aliba kibongtem aika nung Yisu ajanga tekümtet indang jembitsü merangdang nuntemba (Resist) ajangshia aruogo, saka shiranga aliba kibongtem kar nungbo parnok sasa dang sarasadem meshia parnok asoshi sarasademja osang tajung lemsa-a parnok taküm nung Yisu Khrista agizükogo. Iba den külemi Arogo balala nung amangbapurtem anir group evangelism ter ben (10 times) tashi tesem balalai oa liasü..

**B. Bible study:** Monday aonong shia Pastor aser women leader tem temolungertem nem Lai tesayuba agatsuü. Iba Bible study ajanga parnok sentep nung Tsüngrem O jembitsü onük yangluba nung kanga yarir aser amangbapurtema kanga temoatsü angur.

**C. Pulpit Ministry:** Küm tepiyong kü kinungtsü Tainla aser külem tenzüker Charemnaro onok asem lemsar Arogo palala nung devotional aser tetsür sentep nung amangbapurtem Tsüngrem O ajanga tesayuba tajung agütsüa arudagi.

**D. Kiboksem :** Küm tepiyong anema aliba anogo tashi Wednesday, Friday aser Sunday aonong Arogo palala nung amangbapurtem kidangi oa nütsüngüba wadang inyaka aruogo. Tuesday, Thursday aser Saturday anogotem nung mamangertem dangi oa osangtajung sangtongba wadang inyaker.

**E. Youth aser children ministry :** Iba ministry ya mission compound nung külem tenzüker Charemnaro (STM) ajanga tongti shilem agia inyaker.

Youth ministry: Saturday aonong shia youth sentep agir aser iba sentong nung lanur parnok 20 shi arua atener. Parnok nem lai tesayuba, personal counseling aser activities palala ajanga koda Khrista den tamang nung aintsü tesayuba agütsür.

**Children ministry:** Sunday anepdang shia tila tanurtem sentep agir. Iba sentep nung tila tanurtem parnok lir (40) shi arua atener. Iba sentep nung mamanger tanurtema karbo arua atener. Küm ka tsüngta nung tanurtem kanga temoatsü ngua melenshia odagi.



*Free tuition ajanga Yisu temeim sayur*



*MAM mission compound nung free tuition tanur nem agutsur*

**Free tuition:** Monday- Friday yimtsüng nung alirtem tanurtem asoshi mapang asem lemsar Nursery – X free tuition agütsür. Student parnok 65 lir. Item ministry tem tenzükba asoshi tamanger tsüraburtem dang masü saka mamanger tsüraburtema kanga pelateper.

Mishmi Agape Mission wadang takok asoshi maneni sarasadem nung yaritsü ayongzüker. Sarasadem nung bilemtetsü onük tem kar:

- a. Mishmi nunger tem dangi osangtajung bener aotsü lemang satema lapoktsü asoshi.
- b. Mishmi nunger nem Yisu Khrista dak amangtsü tamang agajang ta sarasademtsü.
- c. Arogo purtem Khrista dak chichia amanga tamang nung aintsü asoshi
- d. Sarasadem ajanga tanebtsu wadang nung Tsüngremer sayatenya mapa asoshi.
- e. Field nung Missionary aser evangelist tem Tsüngremi tali Pa ain nung amshiang ta sarasademtsü.
- f. Sangküm sentong pbalala koba sa agitsüba lir item takok asoshi sarasademtsü.

## MISSIONAL KIBONG



Mrs. Alice Walling

Kibong ya mezüng Tsüngremi tenzük. Tsüngrem tekolak sûr kibong tenzük saka mezüng kibongi Tsüngremer sentong mataloktsü. Anungji Tsüngremi Noaer kibong, Abrahamer kibong, Davider kibong shimteta David nungi jakzükba Yisu Khrista tashi nung pa sentong angatetdaktsü. Missional Church indang asenoki jembir. Missional ya missionalism nungi agitetba koba tetezü 'missionary mapal'. Argo nem inyaktsü Tsüngremi yutsüba mission ya alima kin ajak dang Pa temeim osang sangdongtsü yutsü. Arogoji kibong kaka longjemba ajanga yanger. Yisu Khrista dak amangertem shia aser kibong shia nem iba Tsüngremer mission inyaktsü nongloktsü. Argo nem nongloktsüba mission takok angutsü asoshi kibong shia tashi ita alitsüla. Temeim aser teyaritep agi anünga aliba lima ka nung tanü asenok alir. Khristan kibong shiai ya alima nem agütsütsü koka lir. Anungji tamasa kibong shia temeim aser teyaritep nung aintsüla.

### Süra, Khristan kibong shiaji missional kibong kaka koda akümtsü. ?

Missional kibong kaji Tsüngrem külemba kibong ka asütsüla. Hopta nung Deobarnü Tsüngrem külembajı masü saka anogo tenet prongla külemba kibong. Iba tekülemba ya Tsüngrem meimba aser Pa den tesendaktep takang ka akaba ajanga dang atoker. Laishibai ashir, Noai Tsüngrem den jaja aser Kibuba nükdang yimlibilem angu nung alima ajunga samatsüba nungi kümzüktsü Tsüngremi Noa nem mission ka agütsü. Tamakoktsü mapa tulu ka inyaktsü Noai agizüka inyakba ya pai Tsüngrem dak tamang akaba sayur. Rong nungi adoker kodang Noai tenla agüja Tsüngrem külem, Kibubai pei mulung nung ashi, "Ni meimchir asoshi tanaben alima atakatem masütsü" (Lipok 8). Tanü kibong aika nung Tsüngrem külemba (kibong tekülem) ya mapa ka ama mesüra anogo tembangga agitsü mapa ka ama inyaker. Tanurtem aikati ya khuret ka amai bilemer mesüra Tsüngremer temoatsü atema tekülem akar ta bilemer. Anungji kodang taküm nung timtem lendong kar ajurur, Tsüngrem nungi pilaa oadoker kechiyong Tsüngremji alima temoatsü atema dang külem. Tsüngrem meimbajı asen kibong tekülem sabi asütsüla. Kibong tekülemji sentsü ka mesüra taitsüba makatsü meji magitsüla.

Mission mapa nung takok ngua tenzüker aika kibong tekülem ajanga tejangraba atokdaktsüba khuli lir. Mesüra apuanı rongnung ka yamala kibong nungi aruba ajanga ajungmesoba. Missionary kati yamai ashir, 'Lanuwa kibong tekülem nung kanga metennüi aten saka tain kuma aodang Tsüngrem den koda sendaktepba alitsü angazük'. Ano kati yamai ashi, 'özü kidang aginüaka, maginüaka kibong tekülem teti agi. Obalai sarasadem, onoki anga. Khen khen chi mechiyungakasa, kibong tekülemba kodanga magii mali. Kü tsüraburi tajungtiba onok nem agütsüogo. Tomokok ali nung tsüketer onok asoshi obalai teti sarasadem. Anungji tanü onok yangi nokdaka lir'. Theologysa mezüngakasa, khristan kibong tajung nungi atokba tenzüker jenti mission mapa nung takok ngua inyakba lir.

## Kibong tekülem koda agitsü?

Yimya agi kibong tekülem nung ken atener, Tsüngrem O azünger aser sarasademer. Tsüngrem külembaji kechi tanurtemi tamasa kanga junga angatettsüla. Aser yimya balala nung parnoki jangratsüa agitsüla. Süra kibong tekülem mapangji tezüdangtsü mapang ka masütsü. Tekülem nung benshitsü tatishitsü kar yamai:

- Laishiba nungi nisung ka taküm otsü bushitsü
- Ainkar tilatem indang bushitsü
- Otsü tapu balala azüngtsü
- Yisu asoba/asüba otsü drama aitsü
- Hopta nung khonung Special Family night akatsü
- Oset kar amshia Lai tesayuba agütsütsü
- Bible quiz akatsü
- Games asayatsü
- Tanurtem atema züluba otsü kaket nungi azüngtsü
- Taintem asoshi Anogoshia Chiyungtsü, yamala kaket nungi azüngtsü.
- Ano tanga asameyng balala nungi angazüktsü akok. [www.famtime.com](http://www.famtime.com)

Item ajanga tejangraba nung kibong tekülem tajungba nung agitetsü. Kibong tekülem akabaji kanga tongtibang. Saka yagi asen kija Tsüngrem den sensaksem akaba meküptoktsüla.

## Sarasadem calendar:

Sarasademtsü onük jenti. Hopta ka nung anogoshia sarasademtsü yamai lemsaa sarasademtsü tatishitsü kar:

- |              |   |
|--------------|---|
| Hombar       | - Tanurtem ajak tekümtet asoshi, kinungbo kibong nungi sosemangsem talisa tanelia tekümtet mekai alirtem atema sarasademtsü.                      |
| Mongolbar    | - Kinungtsür kibong aser sosemangsem ajak atema   |
| Bodhbar      | - Alima asoshi sarasademtsü. Alima map ka yur alima nung mission balalai kong, koda inyaker parnok atema sarasademtsü                             |
| Brehostibar- | Shiranger, timtemer aser missionaryem asoshi sarasademtsü Hokolbar - KABA mission aser missionaryem, town aser city balala nung inyakterem atema. |
| Honibar      | - Tamanger aser mamanger tembar atema.  |
| Deobar       | - Arogotem aser yangji tenzükterem asoshi .   |

Iba anogo talisa hopta tepiyong Tsüngremi len aniba atema tenüngsang agütsütsü aser tarutsü hopta tasen asoshi bendanga agütsütsü.

Yamala sarasadem onük agiba ajanga tanurtemi alima telongtet nung mission mapa ya kechi angatettsü. Aser parnokia sarasadem onük lemsateptsü angazüktsü.

Kibong tekülem ajanga kidang alir temeim aser telongjem nung alitsü yaritsü. Tejen shin o ka nung ashiba ama, 'Külemi sarasadembä kibong kiji külemi alir'. Tanurtem ki nungi pila alidanga iba telongjem teti menungratsü. Mapang telatet ka nung kibong külemi sentepba tekülem agitsü kanga temelabo masütsü akok. Saka iba mapang ya Tsüngrem den nüngdak jembitsü alakteta ayuba mapang lir. Kodang aseni pa jadir pa asen anasa teti alir. Pa dang ajatsü mamadokli. Missional kibong kaka asütsü Tsüngremi yariangma. Amen

# MISSIONARY NUNGI OSANG - 2017



Rongsenkala Imti Jamir  
Thailand Missionary

*"Aser tamang medeni Tsüngrem mulung chidaktsütsü makok, kechiyong shibai Tsüngrem  
dangi arudir, pai Tsüngrem lir ta, aser Pa bushirtem nem tajangzük agütsüba lir ta  
amangtsüla" Ibri 11:6 "Timtem mapang nunga asenok aintsü Tsüngremi yarir"*



aruba Americatsür ka teyari ajanga iba lesson agi. Yisu Khrista asoba otsü video ka tanurtem dang sayu. Americatsür lai Thai oshi jembir asü nungji, ni English agi sayuba ajak lai Thai oshi agi meyipzük. Thaitsür tesayur ka den mapang shia ajurua sensaksema liasü aser la den metemer ayim. Kenü lai kü dang yamai asüngdang, "Kathy's Home nung aliba tanurtemdak dak kechi lir? Ni parnok dak ranglokdang tepela aser tesünep jakden angur. Nia iba tesünepji aginür". Ibai la den Yisu indang lemsateptsü maongka tajung ka liasü. Sentienla Longchar kūna Mae La Camp nung anogo tuku tashi oa monga liasü. Iba mapang nung shisashirtem aser nisung balala den ajurutepa lemsatepdang tanelo temoatsü aika angu. April ita nung ni Thai oshi angazüksü Language School-i aotsüatemä asen arogoi yariba asoshi kanga pelar. Ibai ajanga Thai nunger rongnung tenyaba mapa inyaktsü tesatomba kündaktsütsü. Item atema sarasademtsüra kanga pelatsü:

1. Kathy's Home nung Khristmas amongtsü aser New Year nung Chiangrai-i KABA nungi Thailand-i arua aliba missionaritem aotsü asoshi.
2. April nung ni Kathy's Home toktsütsü anungji iba hostel reprangtsü nübo tajung moajang ta sarasademjang.
3. Kathy's home nung aliba tanurtem aser mapa inyakertem asoshi Khristmas aser küm tasen salem ajak dangi abener.

# DAVID WALLING ASER PAR KIBONG NUNGI OSANG



David Walling  
Uzbekistan Missionary

Tsüngremi iba küm lanurtem den mapa inyaktsü maongka moatsü. Registered arogo ana tashi nung “Capacity Building through Soft Skills for Youth” nung ajemdaker inyaka aru. Iba sentong 12 ben tashi agia arudang lanurtem 205 tashi aten. Lanurtem aika parnok sempet agi Tsüngrem tenzüktsü asoshi taküm bendanga agütsüshia temoatsü angu.

Onoki BSF (Bible Study Fellowship) nung Bible Study agibaji English nungi Uzbek oshi-i meyipzük. Tangbo ibaji ajanga parnoki Bible studyji tajungba angatetter aser house church telok nunga amshir. Mezung amongnü Lipok kaket nungi tenzüka Lai bushiba agi, idangji China nunger ka temulung meyipa Khrista agizük. Onoki Tsüngrem tenüng asanger. Halleluyah!



*With some local Pastors*

Taküm küm government-i arogo aser missionarytem ki kar amak; nisung 8 (ti) shi pei limai meyipa yok, item rongnungji özü kibong den metettepa alir South Africa nunger kibong ka dena liasü. Maneni onok kümzüka alitsü asoshi sarasademjangma.

Tsüngremi tesendaktep aika yanglutettsüsa lemang lapoktsüba asoshi pelar. Company ishika nung training agütsüogo aser parnok den contract yangluba ajanga onok Visa-a atsülanga idagi litettsüsa lemang lapoktsüogo.

Uzbekistan nung aliba nüburtem den Tsüngrem mapa tali tuluba inyaktettsü asoshi sarasademjangma. Taoba küm ka tsüngda nung asenoki alima tesem aika nung terroristtemi bomb pokokja, taküm jenti samadaktsüba aser alima raksatsüba indang angashiogo. Taoksatsüka item mapa inyakertem timba ka Uzbek nungertem lir. Itemji timba ka makamaiter tem sen agi mesüzüka iba amala mapa tamajungtemji keralongrartemi inyakdaktsür. Item nisungtem den maneni Tsüngrem mapa inyaktettsü asoshi sarasademjangma. Yisui ashi, “Nisung asoshi ya tamakoktsü, saka Tsüngrem asoshibo ajak takoktsü”. Mathi 19:26.



*Training Local Church Youth*

Idaki onok den külemi inyaker yimpurtem ajanga Tsüngremi mapa inyakba kar lemsatepner. Kü dang Uzbek oshi sayu sangji driving lesson agiba mapang nung külem training agir tetsür kati la kinungbu-i mejungi amshiba indang lemsatepa liasü. Kü tesayur lagi la den Yisu indang lemsatep aser Easter anogo nung sentepi arutsü jaok aser panüji lai la taküm Khrista nem bendanga agütsü.

Taküm küm government-i arogo aser missionarytem ki kar amak; nisung 8 (ti) shi pei limai meyipa yok, item rongnungji özü kibong den metettepa alir South Africa nunger kibong ka dena liasü. Maneni onok kümzüka alitsü asoshi sarasademjangma.



*With Afghan team*

# STM, DEHRADUN REPORT

## Putinungsang Ozüküm



### *Social work mapa inyakba*

nung tajangzük angu. Tsüngrem tenüng asanger. Mongolbarnü shia D. L. Chock, kilometer 4-5 shi ka pilar aliba tesem-i oa fellowship agia liasü. Mapang kabu ya fellowship rongnung tulutiba liasü saka küm ishika tanelu nung lula-a tejangraba meli-i küma adok. Saka tangbo ano parnok kanga tashi ita kümogo ta ni shiteter aser züngsem 15-20 tashi lir. Hokolbar shia ni Manduwalla (5-6 pm) aser Sudowalah (6:15 – 7:30 pm) tesemtem semdanga liasü, ni alidak nungi 20-25 kilometer shi pila aliba tesemtem lir.

Cell fellowshiptem ya ki telung (indoor) nung mesüra kima (outdoor) nung agia liasü. Bible study yimya balala nung agia liasü. Topical series nung, interactive mesüra activity oriented.

Bible study dang masü saka mapang shia deobar temoatsü sentep nung o jembitsü maongka-a agütsü, aser deobarnü shia tenla kidang technical nüngdaktem ni anepalua liasü. NCF nunga yaritepa shilem agia liasü.

Arogo tenyaba nung shilem agiba den külemi Dehradun nungi pila or Naga missionarytemi lapokba schooltema semdanga liasü. YWAM slum ministry, prayer



### *Small group Bible study*



### *Azü agütsüba ajanga taküm kümzüker ta mapa agi sayuba*

walk nunga shilem agi. Ni teti tangar dang tenzükba mapa ajanga tejangzük anguba indang metedaktsünü aser iba ministry nung shilem agiba ajanga ibaji inyaktetogo.

Ni tajangzük aika nguogo item rongnung tongtibangtemji Tsüngrem dak dang temolung alemtsü, anogo shia laishiba zünga Tsüngremden tesüngjem mapang agütsü. Nisung tasen ajurua parnok den tembar yima tesendaktep tajung alitsü aser pastorbar kibong den temoatsütem lemsatepba item ajak ya ni temoatsü ta züngshir. Iba mission-i aoba ajanga ni melenshiogo ta ni shiteter. KABA dang pelar. Tsüngremi ajak moajang.

## MINISTRY CLOSURE AT NAGA CHRISTIAN FELLOWSHIP, MUMBAI

Arep Tzudir  
Pastor, NCF Mumbai



NCF Mumbai nung aliba amangbapur ajak nungi salem.

Taküm küm inyakba mapa kaji Connect tenzük. Iba ministry kübok yimti tesem balala nung cell group tenzük. Connect ta ajaba ama atangji ibai ajanga Tsüngrem aser nisung den tesendaktep adokdaktsür. Kodanga sentepsenji-i marurtem aser deobar anogonü-a mapai aortem asoshi cell group nung arua atentsü maongka tajung angur. Iba ministry kübok taküm küm annual camp ka 1 Peter 2:9 nung amendaker omen “Marked” ta sur agi aser tatenertem ajak asoshi temoatsü mapang ka liasü.

Arogo nung tatalokbatem angudang Tsüngremi ozü asoshi dang masü saka arogo asoshia temelenshi atokdakstsü renemshitsüba mapang liasü. Tsüngremer tesüngmangtsü mapaji Pai kanga tebur junga inyaker. Ozü kibong kanga dang mapang tetemsü nung Mumbai toktsür arutsüsa Tsüngrem sentong liasü. Mumbai arogo nung lenirtem aser taintem shirnoki arogo nungita yari aser ano Tsüngrem meimba arogopurtem Tsüngremi anitetba mapang ka nung ozü kibong-i iba arogo toktsür aruogo. Ozü-i toktsür aruba ama dang masü saka Tsüngrem asoshi maneni tzüra-a aliba arogo ka kümang ni ta ozü kibongi sarasademer. Tsüngremi NCF, Mumbai, ministry maneni Pa sentsüwangshi asoshi amshiangma!



## NAGA CHRISTIAN FELLOWSHIP, MYSORE 2017 OSANG



Toshi Jamir

*NCF Mysore - lanurtem pelatepba mapang*

Iba camp nung Tsüngremer temeim jungkai adok aser Tanelia Temeshi-i mapa inyakba metetta liasü.

Mysore nungi kilometre 120 pilar Hassan district lir aser idakji Naga nunger kaketshirtem aika lir. 2015 nungi tenzüka yangji aliba kaketshirtem tanelia nüngdak peritsütsü asoshi mapa inyaka arudagi. Taküm küm Hassan nung Naga nunger engineering azüngertem parnok 22 lir. March ita onok 20 yangji tua parnok asoshi retreat ka katsü. November ita nung-a onok terok tua parnok temoatsü sentep nung tena liasü. Hassan nung aliba fellowship ministry asoshi NCF Mysore khuret tulu lir. Nenoki maneni sarasadempangma Easter mapang nung kaketshir ka tzü nung tzüsen aser ano December 9 nung kaketshir ana tzü nung tzüsen. Naga Christian Fellowship ministry ajanga lanurtem-i kodang Yisu agizüker aser Yisuji pei kümtetdakba ta nangzüker, ni asoshi ibaji ministry ajanga anguba temoatsü tulutiba ta ni züngshir. Item lanurtem-i Tsüngrem O sayubaji kanga junga agizüker, anungji parnok den Tsüngrem O lemsateptsü asoshi ni kanga tasü itdaktsür. Kaketshirtemi kodang parnok ita shia tsüraburi yokba pocket money nungi ter shilem abener ni temoatsü angur aser ni parnok den Tsüngrem O lemsateptsü ajungshir. Item lanurtem-i arogo aser lokti melenshitsu jembiba dang masü saka pei taküm melenshiner. Tsüngremi ni teti moaja aser amshiba ajanga iba ministry inyaktsü tashi angur. Tsüngremi iba azünger ajak moajang.

*NCF Mysore sports day*

## KHANDBARI , NEPAL NUNG TSUNGTONG TENYABA MAPA INYAKBA

**N**epal lima nung hindu imsü amangertem timba lir aser iba imsü yagi parnok sobaliba ajakji arakmoka lir. Telok tila kari Buddhism imsü amanger saka ibajia Hindu imsü den meyoktepa amshir. Islam aser Khristan imsü amangertem-a telok tila ka lir. 2011 census nung Nepal lima imsü balala amangertem telesma yamai lir - 81.3% Hindu, 9.0% Buddhist, 4.4% Muslim, 3.0% Kiratist (indigenous ethnic religion), 1.42% Christian, aser 0.9% bo tanga imsü amanger mesüra kecha imsüa mamangertem lir. Khandbariji Sankhuwasabha District nung yimtiba lir. Iba yimtiba nung nütsüng yongsük 26,301 lir (2011 Nepal census).

KABA Mission Department ajanga anepalua nisung pungu tashi March 14, 2017 nung anogo asemnu asoshi Khandbari, Nepal-i apuso aser 15 nü nikongdang atong. Iba sentong ya March 16 nungi 17 tashi lanurtem, tanurtem aser tetsürtem asoshi ayongzüka liasü. Iba mapang temoatsü sentep nung ken atenba, taküm khuli agütsüba aser Tsüngrem O lemsatepba liasü. Rev. Purbhu shiba Nepal nung missionary lir pa teyari ajanga item mapatem ajak inyaktet aser sentong ajak nung pai o meyip.

March 16 nü tetsür sentong nung tetsürtem 38 aru. Parnok karbo iba sentong nung atentsü asoshi ghonta 4 tashi jaja aru. Sarasadem tashi, kibong nung tetsür ka shilem aser laishiba nung aliba tetsürtem taküm otsü ajanga tesayuba parnok nem agütsü. March 17 nü tanurtem sentong nung parnok 80 tashi arua shilem agi. Parnok tasoba küm apir telok ana lemdang aser alima poktetba otsü, Tsüngrem temeim, kotak aser tekümtet indang tesayuba ananü tashi agütsü. Ken atentsü aser laishiba azüngtsü-a sayua liasü. Lanur anati oshi meyipzüka onok yari. March 18 nü tekülem sentep 11am nungi 2 pm tashi agia liasü. Parnok tejangraba aser kecha nungnanga meli-i Tsüngrem külemba ngua onok temoatsü kanga angu. Tekülem nung nüngdakba osettem peria maka aser ken atenba aser kongki atemba nung tangazükba peria meliaka temulungjang ajak agi aser Tanüla agi sünga külemba angudang onok mulung nung tejembiba aika liasü. Iba sentep mapang nung tetsür tain kati Yisu agizük. La ya tamanger kati Khristan cinema sayuba ajanga temulung meyip. Sentep temer tanurtem sentong balaka agi. Parnok dang tekümtet aser self-esteem indang sayua liasü. Lanur temeja sentong nung 70 dak tali arua aten.

Himalayas children's home nung aonungshia tanurtem den sentep agi. Iba hostel ya San nüker aser pa kinungtsü-i repranger aser yangi tanur tetsür 4 aser tebur 12 tashi alir. Parnok dang ken sayuba den laishiba nungi otsü lemsatepa liasü. Item tanurtem dak Tsüngrem asoshi ya-tsüraba ngur kanga temoatsü angu.



*Children Ministry*



*Khandbari Tetsurtem training*



*Hostellers den aonung fellowship liasü*

**AOLEMBA JAMIR** – “Oagi aliba tamangbapurtemi Tsüngrem asoshi ya-a tsüraba ngur ni temoatsü angu. Tanurtem den anogo ana dang amongbaji ni asoshi kanga dang tsüra matem. Parnok dang ashitsü aser lemsateptsü jenti dang lir. Ni kenü tanur ka den jembia alidang kü mulung-i 2 Peter 3:8 “...Kibuba tsüngdang anogo kiji küm meyi ka ama, aser küm meyi kiji anogo ka ama lir” aru. Sentsüwangshi ajak Tsüngrem meyong süangma.”

**AMENLA** – “Iba mission trip ajanga Tsüngremi Khandbari nung aliba amangbapurtem den mapa inyakba angutsü tanaben kü nem moatsü. Parnok lemang talang nungi Tsüngrem O angatsü aruba, tanurtem ken atentsü jangraba, lanurtem bendanga agütsüba, parnok tejangraba ngur ni asenok indang shisadanga liasü. Parnoki ishika dang liaka jenti agütsür, asenokbo jenti liaka nungnanga agütsür. Hostel nung tanur 16 lir aser parnok San näker kibong den alir. Parnok timbaka kibong nungi mezüng Khristan akümbatem lir aser pei kibong toktsür kaket shisatsü bushia arubatem lir. Item tanurtem-i künübo Tsüngrem temeim indang par lima, Tibet, nung sangdongtsü ta bilema ni kanga jangratema bilem. Iba mission trip ya ni tanel nung ainba mapang ka süogo ta khuli asür.”

**IMPUTSÜNG CHANGKIRI** – “Short term mission trip-i aotsü ni mapang talangka nungi jangra-a liasü. Ni asoshi Khandbari (Nepal) aobaji mezüng mission trip liasü. Ainlen jajaba tepiyong ni Tsüngrem tatenba metet. Ni, Aolemba Jamir den külemei tanurtem tasoba küm 12-17 tashi den Tsüngrem O lemsateptsü maongka ngua liasü. Parnok tejangraba aser Tsüngrem O asoshi tsüraba aser tasüngdangba ajak langzünüba angudang kanga dang pela. Parnoki English oshi meshiaka takok tashi parnok tebilemba aser temetebaji onok den lemsateptsü merang. Nepal nunger asangur ka pai English oshi kanga jungabo memetet saka onoki English agi sayutsüngiba par oshi agi meyiptsü volunteer asüba ngua kü mulungjang nung kanga tangshi. Tekülemtem tepiyong Tsüngrem-i mapa inyaka liasü. Tanurtemdak ranglokhang parnok tejak nung Tsüngremi agütsüba tepela ka angu. Parnok-i atangji nung Tsüngrem külemer ta ni ajitet. Ni Khandbari nung anogo asem tashi amongdang Tsüngrem temeim jungkai adokba angu. Oagi aliba nübortem kecha meliaka parnok pela alir saka asenokbo jenti liaka ano tali timba dang aginür. Asenoki menemnemi pelaseta Tsüngrem dak amangdi ta ayongzüker. Maneni oagi aliba amangbapurtem asoshi sarasademtsüdi. Amen

Nepal nung aliba, talibasa Khandbari nung aliba adianu aser adianutsür asoshi maneni sarasademjang.

Mission trip tepiyong onok den Tsüngrem atenba metetta liasü. Pa taochi asoshi kanga pelar aser Pa tenüng asanger aser nenok sarasadem ajanga takok ngua senzür aruogo. Tsüngremi ajak moajangma.

### **Mission Trip aortem temoatsü anguba aser parnoki lemsatepa kar:**



*Deobar tekulem mapang nung tantsur kati Tsungremi la takum nung mapa inyakba kuli agutsu*

## TAMANG NOKINKETERTEM



C. Temjen Jamir



**1. Godhula Rufus Brown :-** Godhula Brown ya Assamese nunger evangelist ka. Tebu tenüng Kalibar, Kachari kin nungi sü shitoker ka liasu. Godhula Sibsagar nung aso, lanuwa pa kanga samaro liasü. Saka kanga tia kaa America nunger Baptist missionary Nathan Brown-i yaria school züngdaktsüba ajanga aser pa nem (title) Brown agütsü. Anungji pa dang Godhula Brown ta aja. Pa ya kanga techira, awashi temetet aser tasü tait Assamese nunger asangur ka liasu. Ano kodang pai Khrista agizük, pa dang Godhula Rufus Brown ta aja. Pai tesem aika nung sayutsüngia nübortemi pa dang Godhula Babuji ta aja, anungji yimtsüng arogo tenzükba otsü kongsa pa atongsema ali item ajak nung pa tenüng Godhula Babu ta amshia angutsü. Naga tenemi atua Khrista yimsü sayutsü Dr.Clark aser Godhula tena tejangrabaji kanga tulu liasu. Aji oda Süpongmeren teyari ajanga October, 1871 küm Dr. Clarki Godhula Molungkimongi osang tajung bener yok. Ibai mezüngbuba Ao kin dangi osangtajung bener arubaji liasu. Timtem aser shisabulu tulu liaka item ajak kokteta anogo asemnü tashi ken tena, sarasadema monger pa den Molungkimong nungi temulung meyiba nisung tuku anir Amguri-i meyipa alu Item nisungtem November 11, 1872 Sibasagar nung tzü nung Tzüsendlaktsü. Iba mapang nung jagi tenzükä Godhulai Molungkimong aiben semdang.

April 6, 1872 nung Dr. Clark ajanga Godhula aser tebutü Lucy Molungkimong nung lia sayutsüngitsü anasa aliba yimtsüng kari yok. Molungkimong nung dang masü yimtsüng temeket aika nung Godhula Khrista yimsü sayutsüngia jajaba otsü nung lir. Naga nunger tetsübutü shiruru ama nisung tekolak alepba kin den Tsüngrem mapa inyaktsü mulungtetba jagi pa ya kanga tasü tait nisung ta sayur. Godhulai asen lima dang masü saka Chang aser Sangtam lima tashi osang tajung sayutsüngiba arogotem otsü nung angur. 1892 mapang ka nung Rev. Godhula aser pa kinungtsü Lucy dena Noksen yimtaki atu dang tamanger ka tenüng agi Hongsayemchong, pai teberem sü agi tesülen Godhula ponger yimdkai atok dang ola tulu agi ayima “Esoba Yimsü Amangange, Esoba Yimsü Amangange” ta ayimba otsü nung shia lir.

Godhula 1880 küm tatemlen Sibsagar nung Ordain asü. Aser Merangkong Arogo nung 1881 – 1884 tashi Pastor mapa inyak. Dr. Clark-i 1895 meta pa Ao lima yimtsüngtem sema Khrista yimsü sayutsü nükjitong nung tamasa asen Aoer yimya aser libaliro metettsü yok. Godhula ya tekolok techira, aser tasü tait sayutsüngir ka, kentener tajung ka, temeim agi sünga aliba den ajak den sako litetba taküm ka liasu. Pa kinungtsü kanga tasü tait tamang nung kanga temulung tulu tetsü ka liasü ibaji ajanga otsü kaket kar nungbo lai metsübüi Tsüngrem mapa inyakba kanga jangja-a shia lir.

**2. Rev. C.D. King :-** Ao lima nung Rev. Dr. E. W. Clark ajanga Khrista yimsü agizüker külen Angami lima nung Khrista osang tajung sayutsü Missionary ka ama C.D. King shimtet. Pa aser pa kinungtsü Kohima-i atutsü asoshi February 2, 1879 nung Chumukedima atong. Aji saka tensa majungba ajanga British sorkari tena Kohimai atutsü memela nung February 25, 1881 nung ang Kohima tonga atu. Rev. C. D. King ya Kohima District nung mezüng missionary ama aru. Pa den kinungtsü aser tamanger pezü Assam nungi anitaka atu. Naga lima nung zülu makaba mapang ka asü nung Laishiba zünga Tsüngrem O angatettsü asoshi zülutsü aser azünctsü mezüng angazüktsü kanga tongtibang ta meteta Rev. C. D. King-i shisa kaa school ka tamasa lapok. Iba school nung British Sorkari tesayur ka asoshi ita sen agütsütsü nangzük. Ibaji mezüng buba Angami lima nung mission mapa tenzükba liasu. March 29, 1883 nung Rev. C. D. King ajanga tamanger eshika lungjemtaktsü aser Kohima nung mezüng Baptist Church ka tenzükdaktsü. Rev. C. D. King ajanga 1885 nung mezüngbuba tamanger pezü tzüsena Khrista agizükdaktsü. Aji oda wadang tulu liaka kibong nung shirang timtem kar ajanga Rev. C. D. King aser par kibong 1886 nung Kohima toktsü aser Rev. S. W . Rivenburg aser pa kinungtsü Mrs. Hattie tenati iba mission 1887 nungi agizüka nyak.



**3. Dr. Bailey :-** Mezüng Sema limai Khrista osang tajung bener aiba missionaryji Dr. Bailey liasü. Pai Rev. Supongwati aser o meyiptsü asoshi Ungma nungi Imnasüsü anir Sema yim kar sema yimtak tongtipur aika den ajurutep. Pa shiti nung yamai shia lir, “iba kin Aoer ama nübori shimteta yimsü masür saka yim shia tongti nisung ka lir aser iba pangdak kübok nütsüng ajak tiptema alir. Anungji yimtak tongti shiba lir pai Khrista magizükra mesüra mangatetra par yimtak osang tajung ashitsü lemang sadema mali”. Aji saka Ungma aser Ao Sütsü nungi Imnasüsü anir Sema nunger yim kar semdanga osangtajung sayutsüngiba ajanga parlima tamanger aika aküm. Dr. Bailey –i July 4, 1920 nung Sütsü Moya nungi nisung tenet Khrista agizüka Baptitsü aser arogo ka tenzük.

Otsüi ashiba agi 1916 – 1920 tsüngda Dr. Bailey, Rev. Dowd aser Rev. Longwell parnoki tzüla ayong atena or mission mapa ka tenzüktsü merang saka British Sorkai memulung. Dr . Baileyi sorkari memelaka artsü atena or alirtem kin-i dang mulungra ilenji mission mapa tenzüktsü merang. Sangtem kin nungi nisung aika tsüngküm nung Ao limai ayangi aru anungji parnok Tsüngrem meteta kümdaktsü. Dr. Bailey teyari ajanga Semsalepzung 1928 nung Chari yimtak pastor mapa inyaka sayutsüngi mapa inyaktsü lemtet. British sorkari temelaba magi Tzüla ayong adena Semsalepzung sayutsüngi yokba asoshi Mr. C. R. Pawsey tena mangatetep adok. Idangji Dr. Baileyi Pawsey dang yamai ashi, “tzüla ayong atena or alir kinji British kübok malí ta nai ashi. Kibur maliba lima asü nung shinga danga masü dangi yok ta langzü.” Yamaji Khristar yimli asoshi Dr.Bailey-i Sorkar den raktepa mapa tajung inyakba otsü kaket nung shia angur.

\*\*\*\*\*

Otsü ya item kaket nungi teyari agia zülu

1. The New Humanity (NBCC Platinum Jubilee 1937 – 2012)
2. The Coming of Christianity to Ao Nagas (Tiala Imchen)
3. A Book on Nagaland for Class IX & X

## DON'S HOME NUNGI MISSIONARY OSANG



Bendangakum  
KABA Missionary, Thailand.



idakji Children's Home ka pai tenzük. Iba ki December, 2016 nung renem. Ni tangbo iba mission field koba dang Namdtuang ta ajar ajiagi arua inyakdar. Iba mission field ya arem min nung lir aser Maken Sanglir-i yangluba Children's Home tenüng agi "Don's Home" ta ajar idagi Hmong pastor aser pa kinungtsüden yaritepa kü mission mapa inyakdagi.

Missionary inyak dang mapang karbo meyimlaba mapa mesüra tensa ajurur. Khenkhenbo Hmong Pastor den alu-i oa mapa inyaka par jang aser kiset shirurutem anepalutsür. Nikongtsüsü tanurtem den sarasadem mapang agir külen Khristan kibongtem semdanga jajar. Iba yimdaq limapur teimba asünungji tenzükba mapa kanga tulu lir. Parnok dangi osang tajung abentsü kanga tasak lir. Limapurtemi parnok kima kishi nung tu daker iloka ayur iba tetezüji tamangba yimsü tangabo ozü kidangi manioktsü. Tsüngremi kü nem Namdtuang nübortem asoshi khuret tulu agüja lir. Yimlibilema nenoki iba yim nung tanela asentensi asoshi sarasademjangma.

Yangi ni ajiangshia aruba indang lemsateptsü aika dang lir. Taruba küm July tashi ni Thailand nung missionary ka ama inyaktsü. Iba sülen Tsüngremi kü nem kechi sentong agütsüdir ibaji inyaker sarasadema atar. Yimlibilema ni atema sarasademjangma.

**I**ba küm ya Tsüngremi kü sarasadem aser Patenangzükba atalokdaktsüba küm ka lir. 2013 küm Tsüngremi kü dang pungmang ka sayu. Arem min ka nung ki tasen ka school ki mesüka ni pungmang nungji angu. Onok ana asem kati repranga alidang ,tesülen nungi nisung kati arua nenoki iba school ya lapoktsüla ta ashi. Küm asem lir Tsüngremi iba pungmang atangji nung atalokdaktsü. Tsüngremi missionary Maken Sanglir nem mangdang ka agütsü – Hmong yim, koba Laos aser Thailand artsü nung lir,



## HITI MEMORIAL SCHOOL OSANG



Lanuyanger Ozükum



tanabuba nung KABA teyari ajanga ABAM-i kü nem Ministry-i license agütsü. Tsüngremi Pa tenzükba mapa nung temaba jenjangi ajungket nung Pa nem tenüngsang agütsür. Item ajak ya temoatsü dang masü saka ni asoshi tenzükba wadang tuluba akümer asü nung ajaki ni asoshi maneni sarasademjangma.

Yangi Silonijan nung Tsüngrem memetetba nübortem tenzüktsü asoshi Tsüngremi kü nem lenmang lapoktsüba atema kanga pelar. Hiti Memorial School ya tenzüker küm asembuba lir. Iba school nung taküm küm tanur 87 lir. Taruba küm nungi tanur teimba arua azüngtsü yimlar. Yangi class LKG nungi class VI tashi lir aser tesayurtem 9 lir. Parnok rongnung anabo Hindu nunger aser tanüngba tesayurtemji tamangertem lir. Iba school nung azünger tanurtem rongnung tamanger 11, Buddhist 12 aser hindu 64 lir. Yamaji Hiti school nung azünger tanurtem ya tamangba yimsü balala nungi lir. Tsüraburtem teimba süngo lu nung ayangertem lira ser parnoki azüngtsü aser zülutsü memetet. Ano parnoki pei chir koma anepalutsü mesüra sayutsü memetet. Anungji school nung lesson sayuba dang masü saka anogo shia libalirotsü indang sayur. Ano temulungertem nem angadi tuition agütsür. Aji oda, school nung dang masü nübortem rongnung inyaktsü maparen aika dang lir.

Onok aliba tesem nung Hindu Nepali teimba aser Khristantem eshika dang lir. Anungji School nung tanurtem dang sayuba dang masü saka nübortem rongnung holistic ministry junga inyaktettsü asoshi maneni srasasdemjangma. Kanga pelar.



## MISSION ANGATETBA NUNG AO AROGO KÜM 120 TAIN



*Rev. Dr. Nuklu Longkumer  
Secretary, Church & Mission, ABAM*

E.W. Clark, Ao limai osang tajung sangdonga arogo tenzüka arur küm 25 ajungba benjongmong ka Molungyimsen nung March 12-14, 1897 nung sentep. Iba dang mezüng Ao Mungdang ta aja aser iba Mungdang nung telemtetba aika rongnung tongtipangkaji “Aoyim ajakleni sayutsüngi-i aotsü”. Ano tanabuba Mungdangji 1898 küm Impur nung sentep aser ano telemtetba tajung aika rongnungi kaji: “tangar kin dangia osang tajung bener aotsü”. Tsüngremer tenyaba mapa inyaktsü lemtetba ama 1972 tashi nung Ao yimtsüng ajak nung aser temeket kin: Lotha, Sema, Chang, Konyak, Phom, Yimchung aser Khiamniungan kintem dangi osang tajung bener ao.

Ao limai Osang tajung arur küm noklangjungmong 1972 nung among dang Ao Baptist Arogo Mungdangi Arunachal Pradesh nung Yisu osang tajung sangokja nübortem dangi aotsü lemtet. Jembiba ama mezüng Tangsa kin dangi ao aser parnok den küm 25 tashi Tenyaba mapa inyaka arur arogo aser Mungdang lenisüba maparen ajak par nem bendanga 1998 nung agütsü. ABAMi parnok toktsü dang local arogo 63, baptiba züngsem 4500, Ordained Minister ana aser Khristan Minister's License akar 15 liasü.

Tangsa kin den inyaka arudang Wancho kin den Osang Tajung sangokja 1977 küm nungi tenzük aser parnok denbo küm 33 tashi tenzüka aru. 2010 küm ABAMi parnok toktsü dang arogo 63 den baptiba züngsem 13,370 liasü.

Arunachal lima nung Ao Arogotemi osang tajung sangoktsüba kinji Nocti lir. 1992 nungi par den Tsüngremer Mission mapa tenzük aser 2018 June ita nung küm 25 ajunger. 2016 osang ajanga ashiba agi Nocti lima nung arogo 52 aser Fellowship 4 tenzükogo aser baptiba züngsem ajak agi 5078 lir. Tang tashi nung limapur yim ka anünga lir aser yangji kanga merangtangaka ano arogo metenzükteti lir.

Nocti nunger den küm 25 buba tashi tenzüker külenbo par sasa bener aotsü nungloktsütsü tangatetba nung mission mapa ajak inyaka aru saka Nocti Baptist Associationi ano küm 5 maneni yaritsü temepishiba aru nung iba temepishiba shitiji asenoki senzüka meyutsütettsü. Iba wadang asoshia ajaki sarasadema atadi.

Zemi kin rongnung 1986 nungi Sugar Mill (tang Unity village) Arogoi anir arogo ishikati Zemi kin den Mission mapa inyaka oya lia, ibai Khristai nungloktsüba wadang ta ABAM-i 2003 küm nungi Zemi Supportive Mission (ZSM) tenüng jar inyaka arudagi. 2016 nungi tenzüka ABAM lim arogotem aikati Zemi nübor den osang tajung abenba nung shilem tajung agia arudagi. Zemi nunger den teinyaktsü aika aliba reprangteter. Anungji sarasadem, rongsen aser nübo agi talisa parnok anasa aliba Ao Arogotemi shilem tajung agitsü ayongzüker.

## **ABAM International Ministry (AIM):**

AIM maparen yabo International Mission Agencies den partnership nung inyaktsü lemteta alinungji shirnoki AIM ajanga Tsüngrem mapa inyakner parnokji pei taküm Khrista nem bendanga agütsüba den secular aser theological degrees den professional skills degree/Certificate alinung tang tetendangba balala nung takok ngua nükjidong tongtetsü.

Tanü tashi nung ABAMi Serving in Missions (SIM) den partnership yanglua Missionary tebur ka Lirmen Baptist Arogoi yoka lir. Ano Missionary candidate ana Kohima Ao Baptist Arogo nungi training ajaktemer SIM den ABAM ajanga partnership agia yoktsü mapa inyaka odagi. Tanabubaji Oriental Missionary Fellowship (OMF) den anaben tashi ajurutepa sensaksem kaa arudagi aser parnok den taruba küm 2018 teyong tashi nungjiang partnership MOU-ji yanglutettsü. Ano akok tashi Missions Agency aika den MOU yanglua asen lanurtem shirnoki Kibuba mapa inyakner parnok sademsadema tenzüktettsü lemang bushitsü. Ano küm 5/6 tejaklen nungi sarasadema mapa tenzükba ama Khunming (Yunan Province) nung Music School ka lapoktsü Sorkar-i temelaba agütsüogo. Iba yagi lanurtem den music ajanga osang tajung abenba nung asenoki shilem tajung agitettssü.

AIM Missionary shimtsü terms & conditions 2011 nung lemtetba yangi ano ken jangjashitsür. Ibai tazüngertem atema Missions education alitsü.

### **AIM MISSIONARY SHIMTSÜ TERMS & CONDITIONS (2011 TELEMTETBA PAGE 50-51)**

1. Candidateji theology azüngba dang masü tanga professional skills degree or certificate kabosa akatsüla. Pa/laji institution tajung ka nung cross cultural training agitsüla.
2. Kar secular education ngur missionary onera pa/laji cross cultural training agitsüla.
3. Shiba China limai missionary oner pa/laji local arogo aser ABAM den tangatetep nung yoktsü.
4. Shiba missionary oner pa/laji Mandarine (Chinese oshi) basic bosa asen lima nung agir aotsüla.
5. Missionary shirnok odir ABAM aser arogo tsüngdang telangzüba (accountable) agütsütsü aser mapang shia osang (report) agütsütsü.
6. China limai missionary yoktsü purtem ABAMi lateta aliba sen-otsü (pay and allowances) agütsütsüla.
7. Tensa mapang apir item terms and conditions melenshia inyaktsü.

Tanü ABAM lim arogotemi tongtisa osang tajung bener aiba linüktemji Assam, Arunachal Pradesh aser India tesem kar nung prokshia lir. Asen lima atena oa bendang lima inyakba züngdangra Bhutan, Nepal, Myanmar, China, Mongolia, Cambodia, Middle Andaman, Sri Lanka, Tawain, United States, Laos, Thailand aser Uzbekistan (ano peisasa aoba tenzüker karbo alima tesem balala nung alitsü). 2016 nung ABAM arogotem ajanga Mission wadang nung budget ajak agi sen Rs.11,83,41,458 dak tali liasü (ABAM + Lim arogo). Tsüngremer alurutsü wadang tulu alibaji ngua asenok ajaki temulung ajak agi Tenyaba Mapa maneni inyaktsü ayongzüker.

## NAGA CHRISTIAN FELLOWSHIP, DEHRADUN-2017 OSANG



Meyikümzük Ozüküm

*NCF Dehradun*

agi idakji yaritepdagi. Taküm küm kü temang nung timtem tila katì atong aser mapang shitak nung ni Nagaland-i shikmeni arutsü lemang lapoktsü nung Tsüngrem tenüng asanger. Tangbo anema dang lir aser Pa mapang nung Tsüngremi ajak abensadaktsü nung Pa tenüng asanger.

Mapang kabu ni tanelu nung tebelemtsü agi sünger liasü aser taochiba Tsüngremi Pa kilir saksalemtsü nüngtak ta metet. Yangi aliba arogo ajanga KABA missionarytem asoshi June ita retreat ka ayongzük. Külem tenzükertem India tesem balala nungi arur Tsüngrem O lemsatepdang aser parnoki ajangshia aruba timtem lemsatepdang tanelu nung tashi tasen angu aser ibaji ajanga Tsüngrem tenzüksü tali dang tasü taitba aküm.

Lanurtem asoshi küm tatem camp ka aliba mapang nung Tsüngremer tesüngmangtsü temoatsü meteta aru. Camp nung atenertem khuli ajanga maneni tanelu temoatsü nguogo. Iba sentong alima rongsen-a Tsüngremi moatsü. Dehradun nung alir kibong katì tenlaba aser Nagaland nung medemertem ajanga tenlaba rongsen amshia iba sentong kanga junga liasü. Tanga mapang nungbo senotsü agi meperi-isa aru saka taküm kümbo anüngzüka Yisu marui lira taruba küma amshitsüsa rizünga yua lir.

Taküm küm tatem camp Chandigarh nung monga liasü. Ni iba camp nungi Dehradun-i meyipa arur külen, ISBT tesem nung Bible Study Group ka tenzük. Iba tesem nung ya kaketsiritem aika lir. Parnok ya telok tilala sadanger bible study agir aser ibai ajanga Tsüngrem O bushitsü tsüradaktsür aser lanurtem temoatsü angur. Lanurtem karbo temoatsü sentep-i maruaka bible study nungbo teti atener, kechiba süra bible studyjibo pei kiyong nung alir saka sentep-i arutsübo lemang talang lir. Parnok bible study atema atenshibaji asenok sector fellowship mesüka lir.

Yisu asoba benjong amongtsü tonga aruba mapang asünungji NCF Dehradun choir-a ken bushitsü hopta ishika tejaklen nungi tenzükogó. November ita hopta tanabuba nungibо sayutsüngiba onük ajak Khristmas omen nung ajemdaker jembia arudagi. Ibai ajanga nisung ajak tanelu nung saksalema Khristmas amongtsü tangatetba nung ya inyaker.

Dehradun nung aliba NCF ministry aser ozü kibong asoshi maneni sarasademjangma.

*NCF Dehradun camp*

# SHORT TERM MISSIONARY-2017 OSANG

Imtichila Jamir

**N**i Mishmi Agape Mission, Arunachal Pradeshi short term missionary aotsü arogoi maongka agütsü nung kanga pelar.

Ita tenet tashi mission fiel nung inyakdang temoatsü jenti nguogo, Tsüngremi ni Pa mapa tuluba inyaktsü asoshi renemtsür ta amanger. Ni September ita tanurtem rongnung tesayur inyaktsü oa liasü. Ita ana tashi kanga timtema aru. Ajak agi tanur 76 tashi tuition agi; parnok class tuluba nung liaka alphabets dena azünctsü mesüra zülutsü mekoki liasü. Ita ana tashi parnok dang alphabets aser number azünctsü sayu, parnoki mezülüteter asünungji parnok teka nung ammeter sayutsusa aküm. Item tanurtem dang kodasür sayutsü ta ni kanga shisabulu saka Tsüngremi künem tashi aser taremzük agütsü. Hopta peyong tuition agi aser honibar anogobo lanurtem den Tsüngrem O lemsatepa, ken aser tsüngsangba sayua liasü. Deobar anepdang Sunday School sayu.

November ita nung asen arogo-i tanurtem nem lema agütsüsü asoshi süoshi bag ana bener yok. Tanurtem aika asünung nisung shia tula ka dang ata saka parnok-i kanga pela agizük. Tanur kati paibo tulaji jungjunga shitoker almirah nung ayutsü aser deobar nü dang asemtsü ta kü dang ashi. Iba o yagi kü mulung nung kanga tangshia liasü. Nibo deobar anogo shia süoshi balala dang aginür saka parnokbo tula tasemtsü ka dang liaka pelar. Asen kechi aka ajiagi asen pela alitsüla.

Tsüngremer nütsüng ka ama ni iba mission field nung aliba mapang nung teti Tsüngrem O lemsateptsü asoshi renema alitsüla ta angazük. October ita nung ni Manyulaing arogo semdangi ao aser iba sentep nung tetushi tekülem mapang temli san nükeri kü dang Tsüngrem O jembitsü asüngdang. Paisa Hindi oshi agi minute 45 jembiang ta ashi. Saka Rev. Arenlai ashiba ama ni teti kü sermon kaket renema bener senzür aser ibají ajanga ajungbena süaka san nükeri asüngdangba ama ni Tsüngrem O jembia liasü. November ita-a Lamliang arogo nung Tsüngrem O jembitsü maongka angu aser nisung ajak temoatsü tulu angu. Talisa ni sayutsüng dang tetsür ka jeba liasü.

Ita tenet tashi kanga dang temoatsü nung among. Ni tarutsü mapang nung arogo tenzükertem aser kü studenttemi ni asoshi farewell sentong ka ayongzük. Parnoki kü dang temeim mapa jenti sayu aser ni sarasademtsü. Ni temulung kanga raksa liasü. Mission Coordinator aser par kibong aser oagi aliba amangbapur asoshi maneni sarasademtsüda ta ayonzükter.



## NAGA CHRISTIAN FELLOWSHIP AIZAWL- 2017 OSANG



Benjamin Kichu



Eastern States ajak nungi arua azünger, item fellowshiptem den NCF, Aizawl küleme teka amteper mapa inyaka odagi. EU aser VCCF den tesendaktep kanga junga alibayong mapang shia parnok den tekülem aser lemsatepa alir. Ni EU ministry den aisü nung yariteper aser hopta shia Tekülem aser Tetushi nung shilem agia yarir. VCCF-i ita shia deobar ka NCF nem lemezükja ni parnok College-i oa tekülem aser sarasadem agibadak alaka counselling-a agütsür.

Presbyterian Church of Mizoram kübok English Congregation Church (ECC) ka lir; NCF-i ayongzüka ECC den telongjem sentong ka agia liasü. ECC-i yamala telongjemji küm nung khen akatsübaji junger ta shia liasü.

Lanurtem den sensaksem alitsü kanga tongtibang lir kechiba süra ibai ajanga parnok den tesendaktep atokdaktsür aser Khrista khuli asütsü mapang tajung angur. Yangi aliba lanurtem ya kidang nungi pilar hostel nung alir asünungji timtem tuoshi aika ajangshia alir. Mapang ka nung first year student kü dangi arua pa aonung mejanga moteter ta shia liasü. Ibai ajanga anogo peyong pai kecha meinyakteter aser class nunga temulung magütsütetter ta ashi. Pa den sarasadema lemsateper pa dang mejangtsüba routine ka amshitsü ashi. Anogo ishika lir pai pa tajungba kümogo ta ashi, tangbo pa NCF sentep aser hostel sarasadem mapang nung teti atener.





Ano asangur ka depression ajanga kanga kangshia liasü. Pai, ola kari pa den na soseta süang ta jembibasa angashir ta shia liasü. Nikongtsütsü mapang nungsa iba asangur aser par kibong den mapang tatsüka sarasadem agia aru. Tangbo Tsüngremer taochi ajanga pa tajungba kümdagi aser pa depression asoshi mozü machi-i kümogo.

Taküm October ita asentensi sentong ka agia liasü aser iba omenji “Nükjidong yur Taküm Aliba” nung ajemdaker agi. Iba mapang nung tejembir kati pei sasa soseta asüba onük jembi. Tasü tait asangur pungu-i parnok sseta sünüba indang khuli süa liasü. Item lanurtem asoshi sarasademjangma.

2014 küm Mr. Tiatoshi Longkümer-i Praise Fountain anir NCF Aizawl semdangba mapang nung ni mamangbapurtem kari Yisu aser Khristan tamangba yimsü indang kanga metetnür ta lemsatepa liasü. Item rongnung-i tetsür ka tenüng agi Pranisha shiba Hindu kibong nungi lir la tamang nung maneni indagi. Ano Jyoti shiba Buddhist kibong nungi lir, la-a October ita nung züngtemogo aser Khristan kümer pei kidangi meyipa ogo. Tenaprongla Sikkim nung alir. Kibuba nung onoki pelar. Parnok anogoshia Yisu den jajatsü sarasadem nung yariangma.

Aizawl nung mental illness centre ka lir aser idagi Naga nunger ana tashi puoka lir. Tena ya kü guardianship nung lir, ni mapangshia tena semdanger.

Mizo nunger ya nisung tajung dang ta nibo bilemer maka parnoki tangar den kangabo memedemer. Künü 8:00pm meta ka Mizo nunger kiyonger kati ozü kidangi yi agi meseper arua pa kinungtsü-i pa toktsür aotsü ta ashir ta ashi. Par kidangi oa kinungtsü dena prongla den counselling agia sarasademer senshi. Par kibong dang kanga junga lir aser ozü den medemer tajung kümogo.

Ozü aliba ki (apartment) nung tangar kibonga lir aser kinungtsü-o kinungbo tetsüngda mepelatep adoker aser kibonga pilar. Iba mapang nung parnok timtem aiben kü densa lemsateper. Ni takok tashi yarir aser lai o nungi lemsatepa sarasademsür. Kibong nung tanepstsü angur.

Ozü jabaso, Chentipong, August ita tuang Aizawl-i arutetogo. Pa October ita nung küm ka abensaogo. Pa ajanga temoatsü jenti ozü kibongi ajurur. Mizoram ya Khristan lima ka süaka yangi kibongtem nung teraksa jenti dang lir. Asen arogoi parnok asoshi maneni sarasademjangma. Ajak dangi Khristmas aser küm tasen salem abener.

## HIMACHAL PRADESH NUNG TSÜNGTONG TENYABA OSANG

Amenla, Merhülietsa

**R**ev. Arenla Longchar, Associate Pastor Mission Iai Ranir onok nisung terok Himachal Pradesh nung aliba Dharamsala aser Baijnath nung tsüngtong tenyaba mapa inyaktsü oa liasü. Item tesem ana nung onoki tenyaba mapa May 26 - 30, 2017 tashi inyaka liasü. Tamasa onoki Dharamsalai ao aser yangji anogo ishika Pastor Shimpu aser par kibong den monga tenyaba mapa inyak. Mezüngnü onoki hindu nungeri lapokba school kati ao. School kiburi onok Khristan ta meteta liaka pai onok mulungsoa agizük aser school tanurtem den laishiba nungi lemsateptsü mapang agütsü. Anogo tanennübuba nung onoki Baijnath yimtaki ao. Iba yimtak Nepal nunger teimba lir. Iba yimtak anogo ana monga tanurtem dang Laishiba sayu. Tanurtem dang Laishiba sayuba mapang Rev.Arenla Longchar-i tetsürtem nem temeja tesayuba agütsü. Tanur tain ajaki kanga jangra-a aten. Parnok dak angazüktsü tejangraba tulu lir. Baijnath nungi Dharamsala meyipa arur maneni tanurtem den class agia liasü

### Mission trip aortemi lemsatepba tatsü agi yamai agütsür:

Yangerjungla – “Himachal Pradesh-i Misson trip aotsü maongka angu nung Tsüngrem tenüng asanger. Iba mission trip ni akaba ajak agi Tsüngrem tenzüktsü ni angazük. Missionarytem aser parnok kibong aser yangji Khristantem koda alir itemji angu dang ni asoshi mission mapa inyatsü tenük lapokba mapang ka liasü. Tanurtem dang sayutsübaji ni atema mapa tasak ka liasü saka tang meyipa reprangdang ni asoshi tangazükba mapang ka bilemteter aser pelar. Ibai ajanga Seminary nung kü practical ministry asoshi tuluanu. Nisung ajak libaliro mesüra yimya yimbong balala süaka, Tsüngrem tenüng nung kodang külemi longjemdir ajak ka dang lir.”

Tiakümzük - “Himachal Pradesh-i mission trip aoba ajanga kü dak temelenshi adokdaktsü. Ni telok jakdang nokdaker mejembitter. Iba mission trip nung kü dang taküm khuli agütsütsü ashidang ni kanga tsübuua liasü. Saka ni kodang noktak kü dak nungi langka pila-a aoba ni meteta liasü aser ni tasü ita jembitet. Ibají Tsüngremi inyak ta ni metet. Tsüngrem den kü tesendaktep ano tali tashi taitba kümogo. Iba mission ain-i aoba ajanga alimai missionaritem aika nüngtaka lir ta ni meteta aru. Tsüngrem asoshi jangrabapur aser Tsüngrem memetebapurtem-a jenti ajuru. Tsüngrem memetebapurtem asoshi kanga aria bilemer aser parnok asoshi sarasademtsür. Joko Tsüngrem indang teti lemsateptsü merangdi.”

Suchamayang Kichu – “Iba mission trip ajanga ni tanela nung temoatsü angu. Dharamsala aser Baijnath nung aliba Khristantem ya kanga dang ajemalu; parnoki Yisu dak dang rangloker. Parnoki mapang talanglang tekülem nung endoker. Parnok tenla ki dang tamantsü menden mali, ali nung dang amener. Parnok asoshi ali nung mena temang timtembaji kecha shia mebilemer, saka Tsüngrem külembajiang taoba lir. Parnok slum nung alir aser parnok kibongtem semdanga parnok den fellowship agiba mapangji ni asoshi kanga temoatsü asü – ni kodanga mamatettsü. Parnok asoshi asenoki maneni sarasademtsüdi.”



Dharamsala School ministry May 2017



Baijnath tsungdong tenyaba May 2017

# MAELA REFUGEE CAMP NUNGI MISSIONARY OSANG



Imtimongba Longkumer  
Missionary, Thailand

**N**i Thailand lima nung Chiang Mai yimti nung worship pastor mapa inyaktsü asoshi yok. Saka ni kodang Bangkok atong idangji Maela Refugee Camp nungi medemer kadi ni ani-i aru. Chiang Mai nungi masü tanga tesem ka nungi kechiba ni tani-i aru ta bilem. Tasüngji onok kodang Maela refugee camp atong idakji aliba refugeeetem timtemseta aliba ngua ni süngmanga liasü. Iba camp tila nung, sobaliba aser yimsü yimpong balala amshiba nisungtem meyoktepa liasü. Item nisungtemji sobaliba kanga metsünga reta amshiba nisungtem lir. Kodang arogo kati sobaliba tali metsünga reta amshidir iba arogoji alima yimya arogo ka küma adoker aser tamangba yimsü tasen sayuba magizükteter. Saka meilungi parnok sobaliba ni angatetta akümdang asenok Khristan yimsü nung libaliro yimya indang tasüngdangba aika kü mulung-i aru. Kenü anogo ni Buddhist monastery (Buddhist yimsü amangertem külemdak) ka semdanga liasü idangji ni Buddhist ka mesüaka parnoki pelashishia agizüka anepalu. Asenok Khristantemia Buddhist yimsü amangertem asenok sentepe aru nung parnoki asenok agizükba amaji agizükba anepalutettsü asü masü ?



Arogoji amanger aser mamanger ajak asoshi süra ajak pelashishia agizükbaj i arogo jakla asütsüla kechiyong asenok ajak Khrista nung ka dang.

Ni Maela refugee camp-i arubaji Yona otsü mesüka lir. KABA-i ni Chiang Mai-i yok saka Maela refugee camp-ang atong. Ya kechi koda asü ta ita pezü tashi bangkaseta liasü. Saka ni M.Div azüngdang Tsüngrem i ba tesem indang kü dang pungmang nung sayur liasü. Ni iba tesem nung aruagi tesayur inyaktsü sentong kecha maliasü kechiaser tesayur inyaktsü ni mejangrar. Saka aji Tsüngrem liasü. Tangbo tesayur mapa inyakba ajanga lanurtem aika den Khrista kuli süteter.

Idaki aliba nübortemji tebur tajung, ochishir, teyarinü aser tagütsünü lir. Parnok den inyaka timtem aika ajurudang tali Tsüngrem anasa aoba meteter aser takümji Tsüngrem nungi tenzüker aser Tsüngrem dak atemer ta angateta arur.

Onok refugee camp nungjagi mozü kidangi aotsüasüng Thai sepai nungi atsükshishia aotsüsa akümer kechiaser parnoki pura jail nung küm pungo ayutsü aser senchi Thai sen 200,000 achitsü. Iba ama lendongma nung aliba ya asoshi mamatetba mapang ka asütsü.

Tatemsa, Leadership Management and Training College kong ni tesayur inyaker iba kübok arogo ka tenzükogo aser iba arogo nung züngsem 60-70 lir. Tang tashi nung limapur ka aser Buddhist ka Khristan kümogo. Ni aser idaki aliba nübortem asoshi maneni sarasadempangma. Shalom.

## BHENGI NUNG SHORT TERM MISSIONARY : 2017 OSANG

– Nukshienla Walling

**M**ay, 2017 nung Uttarkhand nung 'theri' Gharwal district kubok Bhengi yimdak ita ka asoshi missionary tesayur inyaktsü ao. Tsüngrem taochi ajanga ita kaji memetetti süitema ao aser künü danga ni azümesena tezüdanga bilemba kecha maliasü. Ni hostel ka nung anen aser yangji kaketshir 30 aser staff ka ta liasü. Iba hostel ya missionary Merang-i lapokba lir. Ni April 26 nung-i Mount Zion Academy School nung sayutsü tenzük aser yangji student ajak agi 238 aser tesayur 13 lir. Yangji nursery nungi class 8 tashi lir. Ni iba journey tenzükba anogo nungi tatem tashi ni Tsüngrem tenüng sanga iba mission mapa ya tejangzük aser temoatsü aketba ka kümdakjang ta sarasadema liasü.



Oko Merang-i anir onok wednesday, saturday aser sunday shia fellowship agia liasü. Iba fellowship nung tanurtema shilem agia liasu.

Tanurtem-i lai zunga, ken atendang , sarasademdang ni kanga temoatsü angu. Tanurtemji kanga dang teyakyak aser angazüknüba tejangraba tulu liasü. Tanur karbo yimtsüng talang nungi school-i tetsüng agi jaja arur, saka parnok menürema dang angu. Iba mapang nung ni kanga dang shisadanga liasü. School senshir mapang agi meladang khenkenbo tuition agüja liasü saka hostel nungbo anogoshi tanurtem dang lesson sayua liasü aser mapangshia parnok ku mejeptsü. Aseni tangar asoshi tajung kodakha inyakteter ibajiang tongtipangba ta ni yangji oa aliba mapang angateta aru. Tesem tasen asünung khenkenbo ni kanga azüngmeyaka alidang praise and worship ken angaa aser sarasadema liasü.



Kü libaliro aser chia ajemba ajak parnok den kenyongi balaka asünung ita ka tanurtem den alitsü ni asoshi kanga tasak liasü. Tsüngremi kü nem sempet agütsüba aser ni akokba yari ita ka mapa inyaka liasü. Mapang ajak nung Tsüngrem kü den dena aliba ni meteta liasü. Iba mission trip ya ni asoshi tajangzük aser temoatsü liasü ta khuli süa iba osang agütsür.

Adianu Merangba aser par kibong , Mount Zion Academy School, students, staff members parnok atema asoshi teti sarasademjangma.



# UTTARKASHI NUNG SHORT TERM MISSIONARY INYAKBA OSANG

- Sentimongla Longkümer

Tamasa, Missionary Asangba aser par kibong-i tepela aser Khrista temeim salem bendaktsüba lemsateper. Tanabuba nung April 22 – June 28 ,2017, tashi short term mission mapa school ka nung tesayur ka ama inyaka aru dang, arogopurtem-i sarasadem aser shisatsü agi yariba asoshi kanga pelar.

Ni oa mapa inyakba yimji Uttarkashi aser parnoki Garhwali oshi jembir. Khristan-tem atema Yirusalem-ji temeshi jaka ka lir, yamaji iba yim ya Hindu nunger atema Yirusalem ama lir. Idakji Khristan kanga ajema lir. Iba yimdak Asangba ( Japu yim nungi) aser kinungtsü nati English medium school ka mission mapa atema lapoka lir. School tenüngji Pinewood Foundation School aser class nursery nungi 8 tashi lir. Students ajak agi 120-shi idakji azünger.

Ni parnok den ita ka amongdang parnok nungi aika angazük aser temoatsü balala angu. Ni tanur asüdang yamai angashiba ibaji tang tashi mamai lir – nisung aika sentep-i onüaka motetter, ayimtena Tsüngrem tenüng sanga ken tena sarasademuaka mesüteter, Tsüngrem temeim indang sayutsüngia sentaktepnüaka mesüteter. Aser aji ni kü tenük agi Uttarkashi nung nguogo! Yangji amangbapurtem tia ngur ni kanga temulung raksa. Saka ano parnok missionary 8 den longjema fellowship agidang tanela nung tsüraba aser Tsüngrem-o lemsatepdang kati ka nungi angazüka aser ajungshitepba ajanga temoatsü ngua liasü.

Ni Uttarkashi tonglibo, sentep mesüra anasa khristantem aser Sunday School-o Child-a maliasü. Ni kodasür Tsüngrem temeim indang lemsateptsü ta bilema liasü. Saka iba mapang nung kü dangi tejembiba ka aru: “ Tamanger aika tsüngdang sayutsüngibaji dang mission masü, saka Yisu memetetba jaka nung mission inyakbaji mission tulutiba”. Tatem nung, ni Uttarkashi nungi meyipa aru dang idakji aliba missionarytem, tenzükertem aser amangbapurtem atema sarasademsü khuret bener aru kechiaser sarasademi ajak akoker.

Hindu nunger atema temeshi jaka Uttarkashi nungji Yisu dak amangertem aika poktetsü ta asenoki maneni sarasademi ta ayongzüker. Tsüngremi iba osang azünger ajak moajangma



# TSÜNGREMER MISSION TASEN KA MERANGDANGBA

Katimenla Imsong,  
Missionary Teacher, Pua Thailand



**N**i October 14, 2017 nü missionary tesayur inyaktsü Bangkok atong. Tasüngji missionaryem Rongsenkala aser Sentienla den hopta ka tashi tesayuba agütsütsü Mae la Refugee Camp-i apusoaa ao.

Leadership Management and Training College (LMTC) nung kü mezüng class Burma indang History tesayuba agi tenzük. Ni ano College tanga ka nung Sayutsüngir 3:1 nung ajemdaker lemsateptsü maongka ngua liasü. Iba college nung Naga nunger missionary asem tashi tesayur inyakdag. Parnok den kanga temoatsü ngua among. October 24 nungbo ni kü mission field, Pua-i meyipa aru. November ka nü nungi, ni kü mapa Ban Prang School nung tenzüka arudagi. Tanurtem kanga dang tangazüknü aser tashitem lir. Ni yagi arur ita ka junguogo, parnok oshi aser libaliro angazüktsü aser angatettsü meranger. Nenoki maneni sarasadem nung yariangma.



## KÜ TAKÜM KHULI

**Amenla Longkumer**  
Merhülietsa Colony.

Kü tenüng Amenla Longkumer aser ni Longjangtsür lir. Ni Khristan kibong ka nungi intet aser ojala kijai ni aser kü adianu ana reprangtet. Tanur asüdang nungi ni Khristan yimsü aser ozüng nung intet. Sunday school nung kanga jangra aten. 1994 küm, ni ano ayir chanu asüdang lanurtem asoshi asentensi sentong ka nung Rev. Lanu Longchar-i Tsüngrem temeim indang sayutsüngia liasü. Ni iba mapang nung Khristaji kü kümtdakba ta agizük. Saka ni tain küma aodang ni sentepsensi aotsü mejangrai aküm kechibasüra kü tangatetba ka liasü – taküm junga lira aji teperi, sentepi aobaji nüngtak mali. Ni kü taküm Khrista nem bendanga agüjaka küm 8/9 shi ni sentep-i mao, ni Tsüngremer lemangji junga memetetti liasü. Saka Tsüngremi ni Pa dangi meyipa anir aru. 2002 küm kü metemer kari Youth fellowship-i aotsü ajungshi nung ni nungnanga oa aten. Aser meilungi nia youth telok nung tanishir ka ama inyaka aru; 2005 nung ni Merhülietsa nung Youth Sponsor ka ama shimtet. Küm ana sülen künepka Pastor Rev. Bendangmeren aser Advisor Mr. T. Yanger ozü kidangi aru aser kü dang Youth Evangelist mapa inyaktsü asüngdang. Ni tazüngba junga mali aser theology degree aliba nisunga masü anungji ni iba mapa agizüksü kanga nungnanga liasü. Saka iba mapa inyaktsü agizük aser ibai ajanga ni aisü nung tajangzük angu. Kü leadership mapa nung yaritsüsa tangazükba aika angu aser ni jangraba mission mapa inyaktsü lemang lapok. Kodang Rev. Arenla Longchar Associate Pastor, Mission lai mission field-i aotsü asüngdang idangji Tsüngremi ni mission mapa tuluba inyaktsü asoshi renemtsür ta ni meteta aru.



Amenla Merhülietsa Fellowship nung commission asu ministry asoshi teti aginür. KABA-i maongka tajung agütsüba asoshi kanga pelar. Tsüngremi arogo pur ajak moajangma.



Amenla Nov 26, 2017, nung commission sur Kathmandu nung Reaching Himalayas Ministries den tanf inyakdaki.

2014 nung Nepal limai mission trip kati aodang kü mulungi khuret ka aru aser ni iba limai ano meyipa arutsü ta bilem. Ano taküm küm kodang Khandbari-Nepal-i ao Tsüngremi künem kesa khuretji anosa agütsü. Mission week nung kodang Missionary Wabangba den sarasadema liasü pai idangji kü dang Tsüngremi ni asoshi mapa tulutibaka renemja lir ta shia liasü. Saka ni Nepal-i missionary aotsübaji yamai kara-a ataloktsü ta meyimla. Tsüngremi kü tongmelang sarasadem teti langzür.

Tanü ni KABA ajanga missionary ka ama commission asüdang nenok sarasadem kü Nepal ministry asoshi teti aginür. KABA-i maongka tajung agütsüba asoshi kanga pelar. Tsüngremi arogo pur ajak moajangma.

# MISSIONARY TESAYUR OSANG



Onentiba Jamir, Thailand

***At school with my students***

lapoka onok par kidang class agir. Item tanurtem ya timtemba kibong nungi lir aser limapurtem lir, anungji ni parnok dang “Tsüngremer chirtem” ta ajar.

***During one of the team activity lesson at Hat Samran village******Teaching Children prayer in English***

Tsüngrem temeim onsara tulu asünungji item tanurtem sentepi arutsü ajungshir aser English oshi class-i metitemi arur asünungji Khrista temeim indang sayuteter. Mapang kabo tanur ka tetsü arua class koma agir repranga liasü. Lar jala-i Khristan ken atenbaji lai maginü. Saka kodang Chaplainbai ni English oshiji angati dang sayur aser Yisu-i asen kiyongertem dang meimang ta shia lir ta ashi, lai lar jala class-i arubaji menokdang. English oshi class nung atener tetsür chanu ana tashi sentep-i arudar. Ozü arogo nung sentepi arur tanurtem noklang shilem nung neterbo mamanger kibongtem nungi lir. Item tanurtemi Sunday Schooli teti arur aser Laishiba angazüktsü kanga jangrar. Tsürabur limapur süaka karbo pei chir den sentepi arur.

Iba English oshi class tembanga English Bible Camp ka ka-a liasü aser tarutsü nunga yamai Bible Camp amontsüji kü sarasadem lir. Nenoki maneni sarasadem nung yariangma.

***Not and his sister Am two of my students from the church, also from non-Christian families but regular at the church. Both tells me "Pom rak Pra Yisu" (I Love Jesus)***

# PROJECT ERGON OSANG

Mrs. Nükshirenla

Project Ergon ya 2010 nungi Mission Board kübok Home Mission ka ama nüngdakbapur nem teyari balala agüjaa arur.

2017 küm Project Ergoni inyakba osang tatsü agi yamai lemsateper.

1. October, 2016 – March, 2017 tashi nung lanur 5 IT training NIELIT-i yok.
2. Kiyim lanutsür asoshi sentong tajung ka yanglua Yimya Awashi onük nung seminar ka agia liasü. Iba den külemi liquid dish wash yanglutsü sayu. Parnok ajak agi nisung 257 iba sentong nung aten. Iba sentong nung fellowship ajak nungi arua shilem agi.
3. Free tuition kiyong ana- A.G. aser Merhulietsa nung tanur 20 nem angati tution agütsü.
4. APH [Alternative Part Time Helper] parnok pezü metitimi kibong balalai oa yaritepdar.
5. Inyakyim tasen angazüktsü atema committee convenor aser secretary October 16 - 20 tashi Kolkota-i oa item NGO semdang:
  1. Connexion Vocational Training Centre.
  2. Deepika Social Welfare Society.
  3. Ankur Kala Society.
  4. All Bengal Women's Union Block Printing Productions Centre.

Parnok nungi mapa tasen aika angazük aser asen arogo nunga itemji karbo inyaktsü nükla lir.

Asen arogo lenisüba nung Project Ergon sentongtem takok ngua aruba osang Tsüngrem tenüng sanga lemsateper. Tsüngremi iba osang azüngertem ajak moajangma.



# SAWANG WITTAYA SCHOOL NUNGI OSANG



Sentienla Longchar  
Missionary Teacher, Thailand

**V**isu Khrista temeim salem Kohima Ao Baptist Arogo nung züngsem ajunga dangi abener. Tsükmaluru süiogo aser tsüngküm mapang tonga aruogo, saka Thailand nungbo tsüngküm mongpu küm tepeyong teti kesa amai dang alir.

Ki toktsür küm ka aser ita terok buba süidang kükü tenyaba lemang (missional journey) ya tekeprak aser tanepetasü makai ainlen jajaba mapang ka lir. Saka iba ya ni asoshi tajemmetdak lung lir. Ibai ni atema Yisu Khrista tali tajungba aser jangja-a metetba mapang ka lir.

## Sawang Wittaya School, Nakhon Pathom Province



### Taküm küm kükü tenzükba mapa kar lemsateper:

#### 1. Tanur den tenyapa (Ministry with students)

Onok school academic session ya May 15, 2017 nungi tenzük. Küm ana buba ajangshia aruba nung Thai oshi jembiba, tanurtem sayuba tasa, parnok sobaliba aser taküm yimya, chiyungtsü item ajunga nung joko liro medema liteter. Onok school nung NMM nungi missionary teacher tasen ka aruba ajanga taküm kümbo ni class 3 nungi 6 tashi dang sayu. Kükü class nung joko tanurtemi anepdang shia English agi sarasademer aser iba den küleme ni mapang shia Laishiba nungi otsü parnok dang ashir.

Grade 5 nung tebur chanu techira saka samaru ka lir. Pa ya Buddhist kibong nungi. Taoba kükü ni kodang English agi sarasademsü sayu, ni parnok dang teka amteper aser tenük amor sarasademsü sayu, ajaki tashi anga inyak saka paibo kodanga yamaji meinyak. Anungji ni pa dang kechiba tashi manger ta asüngdangdang pai kükü dang yamai langzü, "Teacher! mai mi pra jao". Tetzü, tesayur Tsüngrem mali. Anungji ni pa dang nai kodaser metet ta asüngdang. Pai langzü, "Mai hen" "ni mangur." Anungji ni pa dang nai tenük amur

temulungjang ajunga agi sarasademra nai Tsüngrem angutsü ta langzü. Tasüngnep class nung pai tashi anga tenük amur sarasadem aser “Amen” shir külen pai ashi “mai hen. Hen mai? “ni mangur. nai angur na?” ta par medemer dang asüngdang. Aser ni pa dang nai kenübo angutsü ta tanemi ashi. Iba anogo nungi ni pa asoshi sarasadem. Taküm küm nungi iba tanur ya Sunday school-i arur aser pa taküm melenshiba angur. Kodang temulungjang ka ser lungjemer sarsadmdir yangji tashi tuluba lir ta asüba ya ni ajangshia arudar. Nenok sarasadem teyari ajanga tenyaba mapa nung takok angur.



## 2. Tesayur den tenyaba (Ministry with Teachers)

Ita ka nung hopta asem (hombar shia) anepdang devotion mapang nung Tsüngrem O lemsateptsü maongka angur. School nung English Head of the Department ya Christian tetsür ka lir anungji lai English nungi Thai oshi nung Tsüngem O meyiptsür. Ni anguba tashi nung Buddhist tesayur kar-ibo Laishiba azünger aser temulung agüja angar aser Khristan tekülemba nung yariteper aser shilem agir. Ni asoshi iba ya maongka tulu lir ta kanga pela sarasadema inyaker kechiyong parnok karibö Yisu Khrista otsü mangashidang aser memeteti liasü ta ashir. Kenü anogo Buddhist kibong nungi tesayur tetsür tain katı, “Ni Yisu otsü ya angatsü jangrar aser ni “The Passion of Christ” movie ajir Yisu kanga meima akümer, saka kübubai memelunger” ta kü dang ashi. Anungji ni la dang Yisu dak amanga nübuba asoshi sarasademang aser Tsüngremi pa mapang nung mapa inyaktsü ta ajungshi.

## 3. Khristan Tesayur sarasadem mapang (Christian Teachers Prayer Meeting)

Tenyartem kaket nung ashiba ama kodang tamangertem külemi telungjemer sarasademer yangji tanela temeshi-i mapa inyaker. Anungji kü medemtsür (NMM missionary teacher) künati Khristan tesayurtem sarasadem telongjem alitsü ajungshia liasü. School Director-i anir onok tesayur aser staff 28 saka tamangertembo onok 8 dang. Hombar shia school temer nikongdang onok 8 prongla külemi arua lemsatepa sarasadem mapang alir. Tsüngrem taochi ajanga onok ajak tang tashi temoatsü ngua katı ka ajungshitepbä arudar.



#### 4. Leadership Management and Training College, Mae La Refugee Camp, Tak Province

Kü taküm nung refugee camp nung timtemer yaritsü/ tenzüktsü nükjidong tejangraba liasü aser ibai asoshi ni sarasadema aru. October ita tepiyong ya Thailand school ajunga nung semester sodi lir aser iba mapang ya Tsüngremi ni asoshi alangzüktsüba ita ka ta ni amanger. Asen KABA nungi medemtsür ana Rongsenkala aser Katimenla özü asem yaritepa Leadership Management and Training College, Mae La refugee camp, Tak province nung English camp ka agia liasü. Iba refugee camp ya North West Thailand nung lir aser parnok ya Karen refugeeetem lir. Iba refugee camp aika küm 30 tashi aliba nübor tem lir. Parnok nütsüng ajak agi meyirjang tenem shi lir aser Thailand nung refugee camp rongnung ibai tulutiba. Refugee camp nung hopta ka sentong aliba mapang onok temoatsü kanga ngua liasü.

Deobar anepdang Shalom Arts and Training College (SALC) fellowship nung Katimenla-i Tsüngrem O lemsatep aser nikongtsütsü Leadership Management and Training College (LMTC) nung Lipok 39:22-29 nungi Tsüngrem O lemsatepa liasü. Item college ajunga ya English oshi agi tesayuba agütsür anungji refugee camp balala nungi students tem arua azünger. Asen naga nunger missionary tesayurtema ishika lir. Studenttemji Christian, Buddhist aser kecha tsüngrem daka mamangba kibong nungi arua azüngertem aika lir. Aji süaka parnok ajak deobar sentepe arur aser iba ya parnok den Tsüngrem O ashitsü maongka tajung ka lir.



##### Sarasadem Onük kar lemsateper:

1. Onok school nung 90 percent tanurtem Buddhist kibong nungi lir aji süaka school chaplain-i teti laishiba azünctsü aser sarasademsü sayur. Tsüngremi la taküm nung tali mapa inyaktsü aser amshitsü asoshi sarasadem nung bilemtetdak jangma. Tanurtemi Tsüngrem temeim tali metetstü asoshi sarasademjangma.
2. Nisung ajak taküm yimya balala lir, karibo Tsüngrem O/ Khristan külemba yimya akümtsübuang saka karibo kecha jangraba mesayur. Mamangertem asoshi maneni sarasademjangma.
3. Tang tashibo Khristan tesayurtem sarasadem mapang junga dang agia odaki. Maneni onok tsüngda tanelu nung telungjem aser kat ika ajungshiteptsü tashi meshia sarasademjangma.
4. Karen refugee camp nung sempet tajung aketba lanurtem aika angur. Parnok aikati par nisung asoshi temeten (justice) aser tarutsü taküm asoshi nokdaktsü indang lemsatepa liasü. Parnoki Tsüngrem sentong metettsü asoshi sarasademjangma.
5. Kü tenzükba mapa tali tajungba inyaktettsü aser anema alitsü atema sarasademjangma.

Tsüngrem, shiba ajanga nenok pa Chir asen Kibuba Yisu Khrista den lungjemdaktsütsü aja, pa temulung lemtetba lir. 1 Korint 1:9

# MULTI COMMUNITY CHURCH MANAGEMENT SEMINAR OSANG

September 27 - 29, 2017 Kotkapura, Punjab

- Mr. P. Moa Longkumer,  
Deacon



T amasa Kohima Ao Baptist Arogo nung amangbapur ajak dangi, Multi Community Church (MCC) nungi aser Kotkapura nung aliba amangba purtemi Tsüngrem temeim salem shiokba metetdaktsür. MCC den yaritepa Church Management Seminar ka asen arogoi sarasadema yangluba ama kanga tajangzük kaa sentong kaogo.

KABA nungi Rev. M. Asangba Longkumer, Senior Pastor, Mr. Sentisashi, Pastor aser Mr. P. Moa Longkumer, Deacon September 26<sup>th</sup> nung apusoa ao

aser October 1st nung Kohima tonga aru. KABAi itasen agüja aliba Evangelist Subash Singh-i Sentong ajak acha-ayang. Iba sentong nung arogo lenirtem 55 arua aten. Parnok aliba tesem nung arogoi ayonga Seminar akabaji ibai mezüngbuba liasü aser parnok tejangraba nung atenba ngua onok-ang temoatsü tulu ngur aru. Seminar nung atentsü atema Punjab, Haryana, Rajasthan aser Chandigarh nungi aru. Arogo lenir rongnung lanur-a aika densema iba sentong nung shilem agi, aser parnok angudang asüng arogo lenir aika atutar ta teimla tulu nung sarasadema liogo.

Sentong nung tongtibang onüktem itemi liasü: Pastorji Sannüker; Arogo:Khrista temang, nükjitong, teinyaktsüem; Qualification aser Arogo nung deacon teinyaktsü; Arogo telongjem/Timtem mapang nung telongjem; Tashi tait arogo ka akümtsü asoshi merah kar; Nütsüng süba; Arogo rongsen ketdangsüba (plan & budget, audit, records of tithes/offering); Tamanger shijia khulisür kaka; Arogo ketdangsüba.

Kotkapura aser temeküt tesem nung Sikh, Hindu, aser Muslim tamangertem nisung jenti lir aser Khristantembo tekapu ka sünga dang lir. Iba ama lima nung Khristan ka asütsüji kanga tasak ta reprangogo, saka parnok tanela tejangraba tulu nung aliba ngua onok mulunga kanga ajungmeso. Asen lima nungbo Khristantem kecha rishikangshi mesüra tetsübu makai sademsadema amangtsü akoker saka asenoki zübäzüba amanger. Parnokbo tamanger ka ta sur alitsüji mezüngmeshi, tejendokba, aser rishikangshi jenti lir saka jangraseta amanger.

North India nung asen Arogoi Evangelist 3-4 yur mission mapa inyakba ya Tsüngremer sentong ta angatetogo. Kokerbo ano maneni mission mapa item ama tesem nung oa inyaktsü kanga ajungshir. Tsüngremi KABA mission moajangma.



## 2017 KABA MISSIONARY RETREATS - THAILAND & INDIA

Asen Kohima Ao Baptist Arogo-i onok yangi Thailand nung alir missionary tem asoshi retreat ayongzüka anogo pezü, 11-14th August 2017, kanga temoatsü ngua liogo. Overseas Missionary Fellowship (OMF) Thailand ki tenung agi "The Pines" ta ser Prachuap Khiri Khan province nung anogo 11-13th August 2017 tashi, onok ajak yangji anena liasü. Aser 13 - 14th August 2017 küsa OMF Thailand indang Bangkok Home nung tembangga aru.

"Expect the Unexpected" Acts 12:1-17/Tenyar Mapatem 12:1-17, iba omen nung ajemdaker Rev. Maken Sanglir, Missionary, The Great Commission, pai onok ajak ajungshia tenzük. Asen tulusang Tsüngremi meimlaba mapang nung mapa tulu inyaker aser meimlaba temoatsü yoktsü, anungji tamangertem sarasadem nung telungjem aser tashi alitsüla. Iba den külemi honibar nikongdang onok ajak pei pei mission field nungi lemsatepba mapang agia, mepeshitsüba sarasadem (intercessory prayer) kanga temoatsü ngua atem.

Mrs. Ching Ngaihte, la ya Rev. Dr. Ginnei Thang Ngaihte (Manipur nungi, küm 28 buba Thailand nung inyaker), Senior Consultant, Overseas Mission Fellowship, Chiangmai Thailand, pa tebutü. Lai onok den practical sessions ana tashi agia kanga ajungshi –

1. Cultural Differences and the Communication of the Gospel.
2. Missionary Life and Ministry.
3. What Missionaries Need to Know about Burnout?
4. 10 Commandments for Effective Stress Management.
5. Church Planting.

Tatembang anogo nung Dr. Thang Ngaihte-i mission mapa balalatem indang lemsatep-

1. Mission Experiences.
2. Paradoxes in Mission.
3. Missionary's Life Formation- Sustainable Physical- Social Life Formation and Sustainable Fitness Formation.

Dr. Ngaihte jabaso Mr. Khup Ngaihte, pai Overseas Mission Fellowship, Thailand maparen indang lemsatepa liasü.

Onok ajak yangi tenyaba mapa balala nung tenzükdang timtem aser tepela anogo ajurur. Town balala nung alirji ajurua ajungshiteptsü mapang mangur. Iba retreat ajanga onok ajak külemi arua ajurutepdang pei kibong den ajuruteber amai kanga pela liasü. Asen KABA dang kanga pelar. Onok asoshi sarasadem, temeim aser senotsü ajanga teti yariba asoshi Tsüngrem tenüng asanger.

Tatemsaa onok missionaries tem nungi message tatsü agi lemsateper-



*KABA Thailand Missionaries' Retreat*

1. Lithongse- "Thank you KABA for giving me this opportunity to be a part of this retreat. I am spiritually revived and will get ready to work in the spirit."
  2. Imtimongba Longkumer- "I am encouraged to pray more for clearer vision from God to do stronger missions."
  3. Onentiba Jamir- "I am spiritually revitalized and also feel strongly more connected to KABA and being cared."
  4. Bendangakum Kichu- "I am blessed and will prepare how to cope up with stress and burning out in the mission field."
  5. Rongsenkala Jamir- "In the midst of many responsibilities, I have learned to rest and be calm mentally and spiritually, surrendering and trusting in God more."
  6. Sentienla Longchar- "Tenyartem Mapa 12:1-17 nungi kanga dang temoatsü angu. Sarasadem nung tali akangshia Tsüngrem nungi mapa tulu ajangshitsü yimla meyiba aor."
- Tsüngremi asen Kohima Ao Baptist Arogo tali amshiang aser moajangma.

#### **KABA MISSIONARIES RETREAT DEHRADUN - JUNE 29<sup>TH</sup> - JULY 1<sup>ST</sup>, 2017**



## MISSIONARY DAVID ASER SVEA FLOOD OTSÜ

**L**921 nung, missionary kibong ka, tenüng agi David aser Svea Flood aser jabaso küm ana tain David, Sweden nungi Africa nung Belgian Congo lima-i apusoa ao. Idakji Scandinavia nunger apuani, tenüng agi Ericksons, ajuru aser par pezü-i Tsüngrem dang pa mapa inyaktsü sayuang ta sarasadem. Parnok kibong lanu aser kanga dang meimtepa, bendanga agüja liasü; aser mission center toktsür yimtsüngtem dangi osang tajung bener aotsüji Kibubai mulungba ta parnoki angateta liasü.

Ibai tamang agi agiba mera tulu ka liasü. Arem nungji N'dolera yimtak tongtiba jagi par nübortemi par tsüngrem toktsür tanga tsüngrem dangi meyipa aotsü tsübuba agi parnok yimtaki maitdakstsü. Anungji missionary kibong anaji yimtak nungi mile tesadang ka shi pilar tenemleni tur parnoki ali ki yanglur ali.

Parnoki Tanelai mapa inyaktsü asoshi sarasadem saka telangzüba kecha maliasü. Tebur chanu ka hopta nung anaben tashi an aser entsü ayoki aotsü melaba dak alaka N'dolera yimertem den parnok kecha tesendaktep maliasü. Svea Flood shiba asoajen kanga tila (height 4 feet, 8 inches) liasü, lai yamai mulungtet, "Africa nungertem rong nungi iba tanur chanu den dang o jembitettsü süra, ni pa Yisu dangi anir arutsü merangtsü". Lai hopta aika miima Khrista khuli asü, aser tanur jagi Yisiji pa kümzüksang ta agizük.

Iba dakji alaka lai tangar shinga majurutet. Yamaji alidang parnok rongnung ka sülen ka ta malaria tashidak agi atong aser shirangjen shirang. Mapang tatsüka lir, Ericksons-er kibong timtem maremteti mission centeri meyipa oatok. Saka David aser Svea Flood tena kija maneni N'dolera yim anasa ali Yamaji arem min nung aliba mapang nung Svea Flood mashisa aküm. 1923 nung kodang la tanur asotsü mapang atong N'dolera nung tongtiba temulung anüka aküm aser nu amongba mapang nung yaritsü asoshi tetsür ka yok. Tanurji tetsür chanu ka aso aser la tenüng Aina (a-ee-nah) aja. Malaria tashidak agi kanga tashi mait kümer lia tanur asodang kanga timatamba agi Svea temang kanga mejungi aküm.

Anogo 17 (ter tenet) nü sarasadema kangshir külen la süatok. Idangji David Flood mulungjang yiruatok aser pa mulungjang taku agi sünger leper ka tur küm 27 (metsür tenet) tain kinungtsüji rema yutsü aser tanur ana anir mission centeri meyipa aru. Kinü tanurji Ericksons-er nem agütsü aser pai ashi, "Ni Sweden-i meyipa aoer. Kübutsü süadokerji ni tanur ya anepalu mesütettsü. Tsüngrem-i kü taküm raksatsüogo". Küm ana tain jabaso, David, anir Tsüngrem aser pa tajaba sendok-a toktsür par lima-i meyipa ao.



iFPHC.org

Ita 8 (ti) tsüngda nung Ericksonser kibong nung timtem tulu ka agi atong. Kinungtsü tenaprongla memetetba tashidak ka agi atong ( karibo N'dolera yimtsüng nung tongtiba lagi miim mozü agütsü ta bilem), aser anogo ishika tsüngda nung tenaprongla süatok. Ita 9 (tuku) kinü tanur Ainaji Berg ta ser America nunger missionary kibong ka nem agütsü, aser parnoki la tenüngji Aggie ta melentsür la küm asem asüdang America lima-i meyipa anir aru. Berg-i Aggie kanga meim aser Africa-i meyipa aonungbo la asoshi timtem kar atokdi sü ta tsübuua missionary mapa toktsür America lima nung pastor mapa inyaktsü telemtetba agi. Parnok South Dakota nung lia Aggie tain aküm aser la Minneapolis nung North Central Bible College nung azüng. Idakji lai asangur sayutsüngir ka tenüng agi Dewey Hurst ajuru-a tena kibong aküm. Kümtem süia aodang parnok tenzükba wadang nung takok ngua ao. Tena nem Tsüngrem-i jala ka aser jabaso ka moatsü. Mapang tatsüka tsüngda nung kinungboji Seattle anasa Christian college ka nung president aküm aser iba tesem nung Scandinavia nunger sobaliba aika ngua Aggie kanga sünmganga liasü.

Kenü, 1963 küm, Swedish nunger Christian magazine ka lar mail box nung yujaa liasü. Lai Scandinavia nunger oshi-ji mezüngtet saka iba magazine nung noksa ka lai angu. Iba noksaji Africa lima arem tezülen leper ka nung tetsü tenüng "SVEA FLOOD" ta zülua angu. Aser aji kangki temesüng ka nung zülua liasü. Lai yakta dang Scandinavia nunger oshi meteter College tesayur ka dangi oa 'idaki kechi zülua lir?' ta asüngdang. Iba magazine nungji David aser Svea Flood Africa limai missionary mapa inyaki aoba, tetsür chanu ka asoba, Svea asüba, Africa nunger tebur chanu ka Svea-i Khrista dangi anir aruba aser iba Africa nunger tanursangji tain kümer N'dolera nung school ka lapokba; aser pai par school nung azünger tanurtem ajak Khrista dangi anir aruba aser tanurtemi par tsüraburtem Khrista dangi anir aruba aser par yimtak tongtiba Khristian akümba aser tanübo (1963) N'dolera nung Khristantem 600 (noklang terok) tashi lir ta shia liasü.

David aser Svea Flood-i Tsüngrem-i ajaba anga-a Africa lima-i or timtem toushi aika agia Africa nunger tanur ka Khrista dangi anir aruba ajanga Tsüngremi nisung 600 tashi kümzük! Aser iba tanubosang tain kümer Zaire (koba dang Belgian Congo ta jaa liasü) nung Pentecostal Arogo ka nung nütsüng yongsük 110,000 (lakh ka, merijang ter) madak tekolak aküm. Svea Flood asüba mapang nungji meimchir shisatsü agi dang bilemtsübo iba kibong lanuji Tsüngremi Africa lima-i anir ao saka parnok timtemdangbo sentok ta ashitsü akok. Saka küm 40 sülenang N'dolera yimtsüng asoshi shitakba Tsüngremer sentongji meteta aküm.

Rev. Dewey aser Aggie Hurst kibong kümer küm 25 ajungdang par college-i tena Sweden nung sodi amongtsü sempet agütsü. Idakji Aggie-i tebu chichiba den ajurutep. Tebu, David Flood, tanaben kibong aküm aser jala jabaso pezü liasü. Pa küm nung tain akümba dang masü yi kanga ajemba ajanga tereprangtsü kanga mejungi kümer liasü. Pa mulungjang taku agi sünger par kibong asoshi pai iba ozüng tesashi ya agüja-a liasü: "Tsüngremi ni nungi ajak bener oa atok, anungji shingai-a par kidang Tsüngrem tenüng metetshitsü".

Tedi-o tenu nungertem den pelatepa ajuruteper külen kodang lai tebu ajurutsü indang ashi, idangji parnoki tebu tsüngdang Tsüngrem tenüng tetshira pa ain kanga atoker ta Aggie dang ashi. Kodang Aggie tebu takdangjagi ai idangji lai takdang sünga yi bottle merephshia angu aser tebu yipden ka nung mejanga liasü. Kodang lai 'oba' ta aja pai la tsütsü meyiper jeba ashi "Aina, ni na kodanga tangar nem agütsüuba bilema maliasü". Lai tebukdak azüiter ashi, "Oba, aji kecha masü. Tsüngremi ni yariogo". Idangji, Tsüngrem tenüng angashia tebu nüksü ayimba anenatok aser ashi, "Tsüngremi asenok ajak amatok. Asenok taküm yamai

akümba ya pa tai lir". Iba amaji shir külen pa tejak jaralen shia atok.

Aggie-i tebu tejak nung meyimshia maneni jembi aser ashi, "Oba, ni shitakba atalokba otsü ka nü dang shidi. Na Africa-i aoba aser ojala asüba amajok masü. Africa nunger tebur chanu ka ojala nenadi Yisu dangi anir arusangto agi par yimtsüng ajunga Khrista dangi anir aru. Metsü jang ka nenadi tema yutsübato yinjen ain aser tanübo (1964) Africa nunger 600 agi Kibuba tenzüker. Ibaji ojala nenadi Tsüngremi ajaba langzübayong lir.

"Oba, Yisu-i na meimer. Pai kodanga na mesentok".


Tebu-i meyiper par jala dak rangloka o jembitsü tenzük. Iba anogo anü malu dangsa pai sentokba Tsüngrem dangi pa meyiba aru. Anogo ishika tebu aser jala pelatepa munger, Aggie aser kinungbo na America-i meyiba ao aser hopta ishika tsüngda nung David Flood asü.

Küm ishika lir külen London nung evangelism conference ka nung Aggie aser kinungbo Hurst na tena lia Zaire lima nung Khrista yimsü züena aoba osang National Church nung Superintendent-i agütsü. Sentep temer külen Aggie-i nisungba dang jagi tur David aser Svea Flood indang nai-a angashiogo ma ? ta asüngdanga ni par jala ta ashi.

Idangji nisungba jagi jeba, "Hau ni meteter" ta langzü aser ashi, "Svea Flood ajanga ni Khrista ajuru. Na maso dang nütsü-o nebu nunger nem chiyungtsü bener arutsüsangji ni liasü. Tanü tashi nütsü tenüng aser la leperji onok ajaki tushir".

Pai la dak azüeter jeba ashi, "Onok otsü nung nütsüji nüngtugutiba nisung lir. Anungji na-a Africa reprangi arutsüla". Kodang Aggie aser kinungbo na Africa-i ao yimertem ajungai pelatepa parnok agizük. Saka kodang lai tetsü leper nung aputaka sarasadem aser tenüngsang agütsü ibaji tongtibangtiba aser tajungtiba mapangji liasü. Panü ji sentep mapang nung pastorbai Yohan 12:24 azüng, "Atangji züngpong ni nenok dang shidi, tsükjang ka ali nung tsüker mesüra pa pei kija alir, saka pa süra, pai tejang jenti atanger" iba sülenji pai Tenüngsang Ken 126:5 nungi zünga ashi, "Shirnoki nüksü yima proker, parnoki tepela nung arütsü".

(Iba otsü ya Aggie Hurst-i züluba kaket, Aggie: The Inspiring Story of A Girl Without A Country" nungi tatsüka agizüka züluba lir)



*"Tsüngremji missionary Tsüngrem asünung,  
Tsüngrem nübortemji missionarytem." – Eddy Ho*

# SBBM NUNG SHORT TERM MISSIONARY OSANG-2017

Putinüngsang Ozüküm

**B**ethel Christian High School, SBBM Jorhat-  
i Children Ministry nung short term  
missionary inyak dang ni temoatsü aser tangazükba  
jenti ngua liasü. October 24– 26, 2017 tashi sentong  
agiba nung tanurtem ajak agi 326 tena liasü. Yisu  
nütüsüngtem mesüka onoka nisung 12 tashi (Rev.  
Arenla Longchar, Driver Gobal, Imtichila,  
Putinungsang, Imnakümzük, Tinumayang, Imolibia,  
Yudang, Alila Imchen, Chubarenla, Imlirenla and  
Imnamongla) iba mission trip asoshi SBBM-i alu. Iba  
ministry omen “You are Special” nung ajemdaker  
sentong ajak inyaka liasü. Tsüngrem temeimji nenok asoshia lir aser Pai tejak achia memeimer ta tesayuba  
agüja liasü. Pa yimli asoshi onok nem Tsüngremi lenmang jendi lapoktsü.

Tetenzük nungi Tsüngremi mapa inyakba onoki meteta aru. Tanurtem tanela nung kanga tsüra-a liasü  
aser tesayurtem dang nungi angazüktsü jangra-a liasü. Tsüngremi tesüngmangtsüka onok tetsübu indoktsü  
aser item tanurtem asoshi onok mulungjang nung temeim apuoktsü. Tanurtem kolak nung onoki korang  
semloktsü dang parnok tejak tepela agi sünger angu. Tesayurtemi paper agi yangluba korang semtsüdang  
parnok chubar jala aser jabasotem lir aser kotak nung aliba obalaji chubatem madak Chuba asü nung nenok  
Pa jala jabasotem lir ta tesayuba agütsü.



Tsüngremi sarasadem langzüa kecha timtem makai kati ka angateta lesson sayu. Onoki item tanurtem dang  
temeim sayua anepaluba ngua parnok tesayurtem kanga süngmanga liasü.

Iba mission trip-i aoba ya anogo asem tashi tanurtem dang Yisu temeim indang ashiba agi dangbo  
meperi, parnok asoshi khuret bena parnok tekümtet asoshi teti sarasademtsütsü nüngdak ta ayongzüker.  
Tsüngremi moajangma



## FREE HEALTH CLINIC OSANG

Dr. Achila Lanu

KABA Free Health Clinic (FHC) nungi Arogopur ajak dangi kümtetakba Yisu Khrista tenüng nung salem abener.

Mat 25:40 nung yamai ashir, "Atangji ni nenok dang ashir, item kü adianu tilatiba rongnung ka dang tanga nenoki kechi inyak aji nenoki kü dang inyak".

Asen Kibuba Yisu Khrista alima nung alidang mission tulutiba ji sayatenya palala aika inyaka tepezük tia nung alirtem jenti moaja shi temang nung tashitak palala aneptsüba laishiba nung angur. Yamaji KABA-i mokokminertem (BPL) shirnok temang tendangtsü mozü alitsü peria maliba kibong aika iba FHC ajanga teyari agütsüba mapa tajung asoshi pelaba metetdaktsür.



Iba clinic 2<sup>nd</sup> aser 4<sup>th</sup> Saturday ita nung ananü alir. Team work ajanga ibaya takok ngua arur. Asso. Pastor Mission Coordinator Arenla Longchar-i anir asen Aor medical specialists Department ajak nungi doctortemi pei tajungtiba mapang tenla agüja-a arur. Nurses, Technicians, Pharmacists, mapangsürtem, volunteers ajaki tajungtiba nung yaritepa aruba ajanga takok angur. Tongtipangtiba telokji Sarasadem Committee Convenori anir clinic aliba anepdang shia gondha 2 shiranger asoshi sarasademtsüba ajanga taneptsü angur. Sarasadem tashi agi shirang anepba khuli aika lir. Item rongnung AG colony nung Phom tzür ka la asoshi taneptsü meshia sarasademtsü dang la temang nung lai meteta temelensi ka aru aser tanü tashi la timtem kecha mali taneptsü anguba khuli asü. Tsüngrem tenüng sangdi.

Doctortem rongnunga doctor kati khuli asüba agi pai iba clinic nung nendaka inyaktsü nangzüker künep AG Fellowship nung alidang pa temang manemi liaka apusoa arua mapa tenzük dang pa temang nung tashi maitba ajanga pa collapse asü. Tia kaa medemer doctor kesa room nung lia yaritepa tajungba aküm. Pai ashiba agi iba timtemji kidanglia atalok asübo teyari shitak mengutetla ta Tsüngrem tenüng sanga lemsatep.. Yamaji Tsüngremi FHC ajanga pa temeim jungkai adoka inyakba asoshi pa tenüng asanger.

2011 nungi 2017 tashi nung FHC nung registration agiba ajak agi asen Aor 7125 aser tangar kin 2347, ajak agi 9472 iba clinic nung doctortemi yaria mozü angati agüja





aruogo. Asadanga aruba nung asen Aortemi mozü jenjang tasakba meshia agizüker sarasademdak meteni dang oadoker. Tangar kin mamangertemia taneptsü aginüa arudang sarasadem kanga aginüba ajiteter.

Asen temang tanela külemi anep nung dang tesangwa taküm alitsü. Anungji taneptsü doctor nungi dang masü saka Tsüngrem den longjema sarasadema temoatsü agitsü ayongzüker. Ano maneni koda masüba timtem tashitak tesashi saka tashi tila pei ki toktsür talangi mozü ki tajung bushia motetba purtem asoshi Arogoi tebilemdangtsü kanga lir ta shisemer.

Tsüngremi iba clinic ajanga maneni shirangertem dang taochi sayuang ta sarasademer.



# KABA TAJUNG SAMARIA 2017 REPORT

Rev. A. Chuba Jamir, Pastor

**A**lima tejakleni aoba den külemi, nütsüng yongsük kanga kara jenti renloka aoba asenoki angur. Nisung merijangsa merijang taküm alir ajak chiyungtsü atema meranga inyaker aika lir. Aser yamaji shirnok ket nung rongsen aka, parnok pei aginüba aser chiyungnuba ama peria alia chia ajemer. Saka city aser town nung reprangdangra, kija aser kibong taküm aika anogoshia chiyungtsü, aben süoshi peria makaba adianutem kinük tesem aika nung lir. Item taküm aser kibong atema asenoki aria bilemer. Asen arogoi parnok atema sarasadem den mapa tajung karbo inyaktsü nükjidong yur "KABA Tajung Samaria" ajanga parnok tongtettsü kümshia mapatem inyaker. Arogo telongzük nung tajung samaria ajanga timtemer, shiranger, makamaiter maneni yaria arudagi.

Iba Tajung Samaria ministry ajanga küm ishika asen nübor dak alaka anasa aliba kiyonger tangar kin tensema yaria arur. Arogoi item mapa tajung tila ka inyaktsü maongka anguba ya Tsüngrem sensüwangshi asoshi lir. Aser iba mapa ya Tsüngremi mulungba aser arogo nem nungloktsüba lir.

2017 Küm KABA Tajung Samaria ajanga inyakba mapa kar.

1. Kohima aser Dimapur nung NGO Center kar semdanga teyari agütsü.
  - a. Old Age Home Kohima
  - b. Prison Ministry Kohima
  - c. Prodigals' Home Dimapur
2. Asen arogopur rongnung taxi amshirtem den telongjem mapang ka agia, teyari agütsü aser parnok atema sarasadem agüja liasü.
3. Aolima yimtsüng ka nung kirong lendong nung taküm aser rongsen tesama ajurur adianutem atema teyari agütsü.

Asen meküta mapa tajung inyaktsü, yaritsu jenti lir. Itemi mongui, meyarie teyutsü. Tajung Samaria Sunday amongba ajanga asenok nisung shia mapa tajung langkabo inyaktsü ayongzüker. Mapang tajung alangzüka ne tangi maongka arudang mapa tajung karbo inyaktsü Tsüngrem dang taochi meshiang.

Iba osang azünge ajak Tsüngremi moajang.

*"Temeimji mission tera (root) aser mission sünjangji taküm bendanga agütsüba." – Roderick Davis*

# 2017 FATHER SCHOOL OSANG

Sentisashi,  
Pastor Merhulietsa Fellowship

Tsüngrem teyari aser tashi nung, 2017 küm KABA ajanga item arogotem nung Father School agüja liasü:

### **Tanga Kin/ Oshi Arogotem:**

1. Lotha Baptist Church Dimapur
2. Lumding Baptist Church
3. Peren Town Churches
4. Baptist Mission Church Kohima (Angami)
5. Konyak Baptist Church Kohima
6. Police Baptist Church Alichen



### **Ao Arogotem**

7. Meyilong Baptist Arogo
8. Luyong Baptist Arogo
9. Merangkong town Baptist Arogo
10. Kangtsüng Baptist Arogo
11. Artang Baptist Arogo
12. Sapangya Baptist Arogo
13. Settsü Baptist Arogo
14. Chuchuyimpang Baptist Arogo
15. KABA (Tesem ana nung) Baptist Arogo



# MAM FIELD NUNG SHORT TERM MISSIONARY : OSANG

-Akümwapang Longchar

April 19,2017 nung ni Arunachal Mishmi Agape Mission field nung short term missionary inyaktsü apuso. Missionary Tiamoaden den yariteptsü asoshi ni iba mission field lagi oa liasü. School tanur class ka nungi temabatem nem tuition agütsü aser youth aser church ministry nung yaritep. Tuition class anepdang 9 nungi anüngdang 12:30 tashi agia liasü. Tuition class nung Maths aser English tongtipang süa sayu aser parnok 25-30 tashi aten. Youth parnok terok dang guitar lesson nikongtsütsü shia sayu. Deobar shia Sunday school sayua liasü. Deobarnü arogo pezü tashi nung oa kü taküm khuli lemsateptsü maongka ngua liasü.

Ni iba mission field nung ita ka dang liasü anungji parnok timtemba mesüra nüngdakba indang aika ni meshitettsü. Short term missionary ita ka inyakba mapang tenzükba mapa ajak kesa dang aser item tenzükba mapa balala ajanga arogo ainer ta ni angateta aru.

Medo nunger yimsü balaka dak amanger. Parnoki hindi oshi jembir, saka ni hindi oshi junga mejembitetba agi parnok den jembitsü ni asoshi kanga tasak liasü. Naga nunger tem shibaisa missionary inyaktsü jangrar parnoki hindi oshi tamasa angazüktsüla. Hindi oshi metetra India lima mission mapa junga inyaktetsü.

Parnok dak mulungso aser angazüknbüba kanga lir. Parnoki angazükba jai parnok asoshi dang masü saka tsürabur aser metemertem den-a lemsateper. Item tanurtem dang school kaket nungi sayutsübaji tongtibang masü saka khristan taküm libaliro aser Yisu Khista den koda tesendaktep ayutsüla aji kanga tongtibang lir.

Youth ministry nung junga shilem magiteteba ni nemjema bilemer. Ni mapa inyak dak tesem nungji lanur aser tsürabur tsüngda tepila kanga tulu lir. Lanurtemi tsürabur toktsür mapa tamajungleni meyipba ngua kanga dang temulung shirang-a liasü. Laishiba maliba den osang tajung mangashiba telok ngur ni temulung aria bilema liasü. Asenoki parnok dang osang tajung ashitsü kanga nüngdak. Paul-i 1Korint 11:1 nung yamai ashir, “Ni kechi koda Khrista jilu ajizüker, yamaji nenokia kü jilu ajizükang”.

Short Term Missionary inyak dang ni tajangzük anguba asem lemsateper:

1. Nai atangji nung Khristan taküm ka indang aser chichiba tekümtet indang metetnüra mission mapa inyaktsü ajungshir.
  2. Nai tamang agi jajaba mesüra Tsüngrem den tesendaktepji kechi metetnüra mission mapa inyaktsü ajungshir.
  3. Nenok dang mission mapa inyaktsü ajungshiner kechiaser nia iba mission mapa ajanga Tsüngremer temoatsüji kechi angatettsü mapang tajung liasü.
- Mishmi Agape Mission field atema asenoki maneni sarasademsü ayongzüker. Theology mazüngyong mission mapa inyaktsü lanurtem aika nüngdaker. Anungji iba maongka agizüktsü ni lanurtem ayongzüker. Tsüngremi moajang.



# KABA-i yariba Evangelists aser Pastors



**Robert Joy, Bhimla & tanurtem**  
IEM missionary, Chennai



**Yabaraj Sahi & Kibong**  
Evangelist, Nepal



**Mr & Mrs Sonjong Minim**  
Evangelist, MAM, Arunachal



**Harender Prasad**  
Evangelist, MCCA  
North India



**Kamal Chakraborty**  
Bengali Evangelist



**Solomon, Pastor**  
Zeme Baptist Church  
Nagabazar, Kohima



**Prem Shankar**  
Evangelist, MCCA  
North India



**Kameshor Singh**  
Meitei Evangelist  
Kohima



**Subhash Singh**  
Evangelist, MCCA,  
North India



**Neil Prostia Marak**  
Evangelist  
Karbi Anglong



**Huni Gogoi**  
Evangelist,  
Assam



**Nabin Mandi**  
N.F, West Bengal



**David Walling**  
Talichila aser jalatem,  
missionaries -Uzbekistan



**Tiamoa Yaden**  
Aienla & Senti, Mission Coordinator,  
MAM, Arunachal



**Meyikumzuk Ozukum**  
Bethel & jabaso, Pastor,  
NCF, Dehradun



**Benjamin Kichu**  
Toshinaro & jabaso,  
Pastor, NCF Aizawl



**Khuzhohuto Rhakho & Thunokholu,**  
Pastor, NCF Ahmednagar



**Bendangakum**  
Hostel Ministry, Thailand



**Toshi Jamir**  
Pastor, NCF, Mysore



**Intimongba Longkumer**  
Missionary, Karen  
Refugee Camp, Thailand



**Lanuyanger Ozukum**  
tesayur missionary,  
Silonijan, Assam



**Onentiba Jamir**  
Missionary tesayur,  
Thailand



**Rongsenkala Jamir**  
Missionary tesayur,  
Thailand



**Sentienla Longchar**  
Missionary tesayur,  
Thailand



**Katimenla Imsong**  
Missionary tesayur,  
Thailand